



八七三七

冢宰默泉吳公像贊



先生之學獨列而人不及知先
生之仕弘樹而史不勝書先生
之生世共謂榮而食不什二先
生之歿世共謂哀而惠不一字
頌頌其貌汪汪其度渾乎天設

泯乎疑始嗚呼此先生之所以
為默而去冥至道之極也與

東海九十二翁仇俊卿讚

太保公年譜跋

我王父太保公清操坦度孚於鄉邦偉業
雄文著於朝野歷官所及自百粵滇蜀甌
閩二楚吳越梁豫鄧魏青徐遼陽秦晉武
威酒泉幽燕靡不被其膏沃當時具有頌
碑迄今尚爾尸祝耳目覩記炳炳可述乃
其矜光養晦不自表見之念靳靳不欲人
知而實無不可與人知者如事親則割股

舌耕則人師居室則威如睦族則調恤其
於交遊酬酢間不設城府不涉怨尤或有
蒙其庇而反噬或有嫉其進而含沙或有
乘間而下石者公若不知也夫人臣勲績
持久最難應變為尤難兼二者有之尤難
之難公三應學憲經十年餘而躬範平衡
作成士類終始如一何其久也奉
款賑濟則有截漕糧活十七州縣飢饉之功

分守左江則有晉

勅諭安南都統莫福海之功八閩則有討逆
賊殲渠魁陳日輝之功江右則有息訛言
止居民竄徙之功又有均稅糧正戶籍利
久遠之功奉使視河則有濬餉道佃南江
昭陽二湖抵額稅佐河工之功巡撫鳳陽
則有卻叛寇師尚詔守護

陵寢之功有磔倡亂鄭臣等之功及晉大司

空則有議復白河潮河合流故道省密雲
等縣陸軌歲貲萬金之功有議復建寧鐵
冶二十八所還舊額消亂之功有議建城
瓜洲防倭寇輩

留都保全一鎮廬舍四方行賈之功此皆
呼吸生亂袖機商午而公不動聲色措危
險於太平蓋從筮仕即罹輶軻浮湛郎署
幾十年數歷外藩馳驅絕徼又幾二十年

及乎內遷更復外使徃返出入又三四年
每承一任使則必建一殊勲活數十萬命
省數十萬兵節南北州郡數十萬民力不
惟人心感悅而亦屢有神應至於列之薦
剡則曰二三執事之力臣何能焉迨秉銓
之日甄別品類黜陟人材則又曰

聖天子之明臣何與焉

世廟嘗特

旨命輔臣李公本品覈部寺督撫諸大臣及
臺省諸郎署以賢不以官蓋異典也李疏
公為百官中第一人嗟嗟以

世廟之英斷威嚴叵測大僚鮮有令終而王
父太保公獨蒙簡注完節榮歸亦甚難已
柰何如是大功未霑卹典賢豪短氣窳窳
含冤言者謬據耿梁二公為指摘今疏併
自陳疏具載似不足為公損者一青之微

豈玷全璧仁人君子可鏡而知嗚呼太保
公雅不近名生平未嘗留情注記且文辭
寓諸外弟者並寥寥不可致詰獨家大人
所藏一二梗槩不肖後燥髮稍知覺側聞
太保公語次偶及或遙邇故知追述往事
輒片紙雜投篋中無何霜露屢更日月渝
邁及今不為綴葺後將泯泯益更無徵因
發憤啓篋而差次之編纂之大都千百之

什一耳獨宦途涉應諸大計議大功勳有
關國是民瘼官箴世憲者即不能窮搜博
訪亦略掇其大綱用詔來嗣庶幾昔賢不
朽之業抑亦太史傳信之文嗚呼痛哉天
安得作我太保公於九原一詢端委令我
子孫永永其無遺憾也已

萬曆二十年九月十三日不肖孫惟貞泣
血稽顙百拜書

吳太宰公年譜

公諱鵬字萬里學者稱爲狀泉先生其先吳自

秦伯開國子孫遂蒙國氏秦漢以降離合無常
漫不可攷大都近在三吳諸郡爲多而間亦有
散之四方者如會稽之吳荆楚之吳關陝之吳
寧歙之吳皆勾吳派也而我吳之來樵李則非
向處勾吳之吳而乃關中復歸之吳也勝國前
自關中轉中都逮南渡遂家於浙之海寧園花
里邈焉世遠不能博攷至元有樂軒諱微者

明初稱高隱士實公高祖微生裔裔生昭昭任
岳池縣典史宦歸僑寓嘉興是為秀水人昭生
五子曰賢曰良曰方曰中曰正方字仲矩號履
菴仕為長葛訓導後以公貴得三代勲封贈吏
部尚書母黃氏贈夫人

弘治十三年庚申五月二十二日公生

履菴公居城南之雙鳳里學者延之家塾一日
家人以舉子聞履菴公歸途而遇醵金鑄上元
天官像者屢範不就觀者傍徨履菴公亦以金
投之私祝曰卽像成是兒其亢宗乎已而像立
就公後位冢宰適
懷天官之識云

十四年辛酉公二歲

十五年壬戌公三歲

十六年癸亥公四歲

十七年甲子公五歲

履菴與同郡戴雙湖先生相厚善也一日攜公
訪戴戴方議加木於門或縱之或橫之曰且
以禦盜公從旁聞之笑而言曰鉅盜無堅門而
小盜以穿穴入矣何門之固雙湖先生大奇之
謂此兒必
經略四方

十八年乙丑公六歲

正德元年丙寅公七歲

公七齡就學所授書輒能成誦有穎質時吾郡
鄭端簡公與公皆有早慧名一日集雷雨而
門忽有啓父老令卽事賦句端簡賦門字曰天
地闔闢之公萬人往來之路公賦雷電曰震鼓
其後公與端簡同科第

二年丁卯公八歲

三年戊辰公九歲

四年巳巳公十歲

公九歲日誦千言十歲授毛詩

五年庚午公年十一歲

六年辛未公年十二歲

公弱不好弄獨喜親筆研解悟書法每從戴傳
御公借古名蹟帖臨池摹榻日入精妙後來縱
筆飛灑人競傳之

七年壬申公年十三歲

八年癸酉公年十四歲

公十三巳擅博雅為文多驚人語履菴公曰吾
不能教若矣命師戴雙湖先生門下稱高足

九年甲戌公年十五歲

十年乙亥公始冠十月娶戴夫人

公外少諱綬郡諸生卽戴雙湖先生從弟也雙
湖素器重公遂以弟之子配焉夫人弘治壬戌
六月二十五日
生亦多異兆云

十一年丙子冬十一月公充郡博士弟子員

是年督學憲臣五清劉公天瑞行郡試士公入府庠受徒講學

十二年丁丑冬十月公廩於學官

督學劉公復行郡讀公文奇之置高等以為宿望比唱名迺新進生也益用自喜

十三年戊寅

學者多從公授經公顏書齋曰貞固聯云如其禮樂願不去於斯須非其道義誓不苟於一介

十四年己卯

十五年庚辰

時郡守白泉徐公盈有精鑒試士每錄其文梓之曰拔尤入錄者即作名士而公文竄多名大

起

夏四月公割股愈母疾

公母黃太夫人病不治有道士言禍福輒效履菴公問之有六月中旬便斷腸之句公聞而驚愕慟哭不休私禱於天願以身代剗左股肉為羹以進太夫人飲羹後勿藥而瘥竟不知其所以月餘適公卧燈下戴大人見癢痕乃得其事

十六年辛巳

公自為諸生履菴公不問生產家四壁立矣公為經師多從遊者歲以執贄佐色養焉

嘉靖元年壬午秋公領鄉薦

春正月朔旦公夢乘馬馳西郊有鄉先生呼而問之曰萬里行何往舉鞭答曰春風得意馬蹄

疾覺而自占曰吾其一日看遍長安花乎逾月
憑几讀書倦而假寐隱有神人撫背促而起之
者三若有所授者曰平生事
業皆在此矣至秋試遂獲薦

冬十月公北上

渡江旅夜夢人贈麒麟綺二端詰且為同舟語
之有占曰是顯徵也麟者聖王瑞也系麟於綺
上公服也
神授子矣

二年癸未公中會試舉人李舜臣榜三月廷試登

姚涑榜第二甲進士觀工部屯田司政

三年甲申秋九月公奉勅督營桐廬俞公諫墻

四年乙酉夏四月復奉勅兼督永嘉王公贊貝

公過括蒼卻金館碑志磨滅無可考或曰始為
某立有恙為文者踏之公曰以伯起之介猶有
暮夜及門雖故交不能出肺腑相諒矧其次乎
是故至而卻與攫諸白市者異矣苟有其實石
可裂名不可滅因題其石以俟新茲館者抵家
作貞固齋銘自警門人郁蘭沈銓輩賦詩相勗

五年丙戌春二月公使事竣還京授工部都水司

主事理南旺泉源

分署在於河衛平曠數百里即宋梁山之屯也
流賊亦常經掠公至相度形勢立門築塹集材
鳩工適以艱去未竟其事後來者成其功焉里
中吳介肅公有記

南旺魯故大野為沮洳卑濕地至漕河道汶
流會集遠隄防為河四望可百里許居人鮮少
絕無生產業獨漁樵輩往來即舡艇為息止具
然野處曾無意外虞比數十年來每山潦紆河

浸成沃壤農事日興室廬頗鱗次負販工技亦
稍稍聚多時有偷竊窺覘踈曠輒掠逐牛馬士
人患之莫可誰何余兄弟方為諸生學問實居
河許屬秀水吳公以督泉河至余兄弟廼師事
之公數過省從容語及民事且曰邑里遼邈無
郭郭即有寇盜至奚禦諸余兄弟起謝計無出
公為相度地形下諸官屬曰南北西衝可為里
門三綿亘周圍可為長塹二門皆鍵鑰塹繚和
垣庶幾其有備乎頃之悉如指意廩廩有成功
居無何公以外艱去時久且廢塹埋而門垣傾
圯僅存址墟近復荐值歲侵盜賊紛起往往暴
毒村鄉殆無寧日南旺距汶沼四十里所巡徼
者空至余方謝病家居常懷夜警傍舍有窺人
子積羨曾不滿十金夜有盜十數輩肆劫以去
人人益惶懼余庸重念之會常熟張公亦以督
泉河至余造請告以吳公舊業可毋恐不者復
有他憂公慨然任之亾難色即鳩工舉事更用
恢張舊制規增里門為四區所晨昏嚴閉啓南

北增木橋二即緩急可撒也垣益高塹益深不
再旬而事竣遠近矚目狀如郭郭然其人亦取
役夫空暇民不告勞材木伐河壩斷榴碑石悉
官府棄餘財不稱費於辱世有作者不土其貨
財又率多遊觀臺榭民困息肩豈徒亾益從且
為厲殃今茲役匪直母勞費屹為吾鄉保固俾
人皆安堵寔維吳公張公力嗣是仁人繼踵修
頽補廢將利益益母窮增置永建之業獨無張公
之於吳公哉吳公名鵬字萬里號默泉張
公名文鳳字公儀號立齋俱起家進士云
汶上吳嶽汝喬記

三月履菴公歲貢謁選得長葛縣學訓導公奉侍
而南

六年丁亥公在南旺

卷一
三
四

水魯大旱泉源皆涸夏六月公禱於泰山應
八雪次日即大雨水亦大至隨勢濬之運河
通利時人為謠曰吳公按節六
片飛雪山出醴泉地解龜裂

七年戊子公在寧陽

村履菴公官長葛居恒悒悒公請迎養公累
番公遂謝病大中丞潘公檄止之不能得既至
寧陽就養數月甚懼一日諭公曰年老思土
汝東歸尚羊里社酒人遊耳公涕泣留不可
意官舍與居非適長葛公遂
歸歸不兩月而卒於故土矣

九月十一日子繼生戴夫人出

公謝雨泰山其冬更以嗣禱至是與繼
陳棟壻聞見錄云初余以都水主事提督徂
泉代者默泉公過余言別問曰兄何以教我余
曰然吾將告之乃其一小冊題曰文新忠告錄

於左曰某事吾所經畫頗當君宜仍之某事宜
於前而今有弊吾欲改未改君宜易之某人可
用君用之某人不可用吾欲黜未黜君宜黜之
凡十餘條默泉公初至按冊試一二衆以為宜
迺遂措諸行翕然稱善默泉才賢人也而又參
以吾言宜其善矣自是遂為相知焉餘姚楊二
檀亦以都水管理濟寧代者廣東李汝司二檀
亦告之曰余所以告默泉者汝司唯唯而心啣
之對人曰二檀聖人耶三代相承猶損益渠必
欲吾一遵之何耶後為考功郎竟索癥去其
官夫余與二檀之忠告一也一為相知一為仇
隙何相懸若是耶亦遇夫人之幸與不幸耳而
二公之所
存可知矣

時上

睿宗徽號推恩臣下得封父母如公官

奉

天承運

皇帝勅曰蓋聞先德之積於後裔發之國家敷錫之典爰及其所出來所以昭休澤敦激勸也爾長葛縣儒學訓導吳方乃工部都水清吏司主事鵬之父往以經術之彥領師儒之官位不滿德慶能裕後茂登甲第擢屬冬卿即爾子之賢足徵爾之教朕甚嘉之特封爾承德郎工部都水清吏司主事永綏壽社懋享桑榆曰蓋聞子之賢雖本諸父而母德鞠育恩與父偕肆惟褒典亦與之均焉爾工部都水清吏司主事吳鵬之母黃氏育德名家媿休良士慈悲孝敬克慎母儀又能撫教有方慶垂厥嗣方膺祿養宜錫褒恩茲特封為安人尚服恩休以綏壽善

嘉靖七年九月二十五日

冬十月二十六日履菴公卒閏十一月公奔喪

八年己丑又十月二十一日葬履菴公

公以不及視會每慟欲絕朝夕撫襯而哭足不入室

九年庚寅冬十二月服除奉黃太安人如京師

公訪餘姓奚孟暘視葬地其夕夢行洲渚間入古廟其神指曰此而父佳城當得勝氣是夕奚生亦夢王陽明持王帶見過語次俱心異之即偕行卜幽宅至嘉興縣白苧鄉偶見河濱古廟心動起而登覽固夢境也購而營之未定穴地忽出白粟一莖奚曰此天瑞孝子也

夢隴記

精誠所積一念感通天諒之神護之此理必然不可誣者傳曰至誠之道可以前知又曰至誠而不動者未之有也余於默泉公先隴之夢益信焉公以名進士服官於朝封君先生違豫聞計南奔星廬切望道出清河鄉友東滙呂君

以秋官涖茲土亟弔慰唁公曰罪逆弗侍湯藥
因官之故以苟得善地妥我先靈庶情事少伸
而肄子職也乎呂曰然善地莫如吳郡之東相
地莫如姓江之奚公頷之相嚮而別是夕夢作
奚師至焉其貌頎頎然其言灑灑然相與諦登
隴剝換起伏之佳左右包藏之固龍挾進田
水來砂外天馬文筆各司官垣禽曜星峯悉無
滲漏案馬而琴几出揖馬而麓列羅土厚水深
草木茂盛而又叢祠麗於側石笋標於前公若
疑之師曰秀氣所鍾也既覺惘然恒以弗得是
虞抵家摧毀之餘具幣致書將招之姓江使未
發而先期至矣遂偕山行果然地應市之得諸
至親定穴特產瑞粟庸夫悍子忌抑肆而反中
其身焉噫嘻是豈偶然之故哉天錫吉地用旌
孝思故鬼神呵護蔽於前而顯於今也嘗聞風
水家說福地不輕授人必德足將之然後彰之
夢兆試之圖識否亦迷目以俟吉人矣公孝第
孚於鄉忠信著於朝文章範於世其作人也如

歐陽永叔其立身行已也如趙開道之清介司
馬君實之誠篤樂易可親如程明道頓悟道體
如周濂溪固天縱之眷以叶吉光裕昭矣環嘗
過嘉禾拜瞻封塋迺觀融結之秀真出水金蓮
驚湖福地恐公所夢殆未之悉按其書云曜星
重疊照墳前子孫孫朝帝闕又曰圳塋條條
如鶴嘴兩畔相交指墳起定是豪家清顯貴又
曰面前山水如脫襪鬼運田禾發又曰水來砂
外作陽朝子孫為官更富饒佳城之勝諸書亦
木之悉也是豈易而得哉古云可遇而不可求
者非與夫公之精誠固不區區於堪輿之說然
先靈安則後祉隆寔理與數相乘不可誣也環
浪跡山泉久矣一日吏屬於公得親至教公且
累勢分出肝鬲語及封塋翩然戚戚蓋將責記
於環益知公之誠精而通靜極而靈事雖細微
罔不夢兆顧事親之大無所先哉惟仁人為能
享帝惟孝子為能享親非公其誰不肖忝同鄉
薦知之且稔以此事異而孝章也不可以不紀

遂承命書之以爲雲仍告

天台徐璟記

夢隴原
夫天有常道地有常形君子有常行故昭德錫
符契穹所以示應由盈川冲方輿所以播氣吾
子蹈行茂有淑而弗昌疇或感而靡彰故修德
以召符紀符以志異昭不爽之道協庶徵之應
越百代不能廢也余睹默泉先生夢隴之事於
休哉曷其符瑞之妙臻茲夫地之爲言讒也承
矣行其義也山陵之大非地不制所以舍功牧
生也夫山者宣也宣氣生萬物者也子夏曰商
聞諸山書曰山爲積德是故春陵之鍾璣丘之
樂自馨以然望其墳翠如也宰如也墳如也高
如也蓋所以息物宏後篤慶隕祉世子孫勿替
迺奈闕默泉氏之事親也如事天事天如事親
愛敬飾盡德孝備厚蹈行之隆於是爲至日奔
辭而旋也獸擇不食之地宅先大夫猷及卿士
獸及彤家肆玄夢聘吉爰相嘉禾之山惟肖氣
篋哉鬱鬱葱蔥然嶽峯嶙峋於霞芬暖對旒

靄若鬼若神固天作而地藏之以遺如其人乃
上堯正位諏日戒事悉協夢徵襲於休祥盛哉
繅乎曷其符應之暴也人之精神與天地陰陽
相流通思致咸陟各以類至是故金簡玉字告
成禹績紫石鉅萬爰作敷富二山之所爲異曷
致哉武丁夜感賢弼或獲齊相夢物適兆厥霸
晉文鹽腦握邦寔竟五三之述載爛然足徵也
何則符瑞有自召應由人則天默泉氏之孝德
通於神明章於大地是以發祥流光錫美招胤
勒崇垂鴻寫奕于萬葉豈不克自神明哉鋪觀
天人之際卓哉焯焯元符之臻孝德之昭也是
堪輿之玄機名流之勝務也方宜編載筆之信
典苞縉紳之藻藝光三靈之休徵評後晰符異
相爲昭焉詎不懿哉皇哉不而或恐未睹厥原
別厚德掩息遯東布章豈所以宣述詒永馳於
不朽語曰苟有事必見其軌此之謂矣予於天
台徐子之告紀時事也作夢隴原

蕭廷和序

夢隴說

夢隴言孝思也思極而鬼神通焉以嘉告也凡有始則必有終終則必藏藏也者其欲人弗可見也乎抑人子之事孰有大焉者乎隴有燥濕有否臧鬼神司之栽培傾覆於茲焉寄非直醫形骸藏營魄已也大文宗默泉吳公初官水部奔先大夫之喪慟修路遼隔蒸嘗弗營道清河屬東滙子而商之得姚江魏師皇皇如也維是鬼神告徵以佳隴獻之一曠歸無何會魏師至如城東胥鴛湖之勝叢祠石笋星曜羅列不啻若是其夢寐然者魏師曰美不右茲乎下不及泉上無通臭玄英滌凍朱明滌暑山川之氣鍾也盡封諸迺啓曠得瑞粟數莖見其質白如玉者矣見若瓊膏者矣見枝屈若游龍者矣見若鳳之冠者矣默泉公信而卜葬焉諸盡放古為之可謂古襄大事也也地開諸元氣混沌孝在其中孝誠孚格靈協瑞應是故粟也者續也穀之實蒸黎之命也此之謂國之重寶默泉

代有明德升聞地弗愛寶以粟示之幽隴將世世子孫粒民瑞國繩繩然有如茲粟先大夫亦將安神於有永矣默泉其孝誠而動者乎故曰山海不洩而調神孝子不匱而錫類

惠州李玘說

背郭高人壘山川送遠情山標秦駐近川引鶴湖平祿養逾三釜榮名徹九京淒其昨夢處凝望幾霑纓

程棟

原上封如鬣梧楸起夕煙惟應要離近還侶茂陵丹吉夢將天授畸人與道詮峰攢何萃嶺川赴學之玄純孝南陔詞梁苑傳英才兼五嶺錫類仰仁賢

懷安方邦望

天空望斷鶴音遲夢裏分明指點時十里溪山環秀麗百年風木動追思絲雲爛熳鷓鸞列紫氣飛騰劔佩凝累代馳

封期已重路人傳誦龍頭碑

羅東韓孟良

北牕歌枕睡方甜一夢溪山若宛然他日相逢

韓孟應

秀湖佳勝地天錫孝思家瑞粟呈先兆金蓮次
水涯雲封天馬鬣石標紫薇花餘慶應無已簪
纓奕世華

甯斐

南越牛眠穴遺留歲月深湖山千古夢孝子百
年心鶴唳雲埋玉龍蟠櫃蘊金
封章知幾度血淚暗沾襟

吳相

十年辛卯夏五月補刑部廣東司主事

六月改兵部職方司主事

時太宰汪公鉉重公雅望擬授
銓曹會同鄉有讒之者不果

秋七月奉

命典山東鄉試

詩廷議各省鄉試以郎署典其事誠重之也公
與刑部員外郎施昱以經術見推得山東省取
郭鉉等七十五人一時稱得
士錄文皆出公手世共傳之

冬十月公進階承德郎封戴氏為安人

奉

天承運

皇帝敕曰朕惟兵部乃古大司馬之職厥屬有四
而職方為益重必得其人乃克稱焉爾兵部職
方清吏司主事吳鵬蔚以經術之彥起登甲科
歷官三署乃能端廉自勵勞績並彰其司文衡

得人尤盛一時之士望攸歸簡拔有待朕甚嘉之茲特進爾階承德郎錫之勅命爾益懋乃心修乃業以副朕任賢而治之懷欽哉
勅曰朝廷褒顯羣臣爰及厥配良以伉儷之道內外相成恩宜均焉爾兵部職方清吏司主事吳鵬妻戴氏育秀高門配德名士恪修婦道允宜厥家爰錫褒章用昭節範茲特封為安人茂膺寵光益敦敬戒

嘉靖十年十二月十六日

十一年壬辰秋九月轉兵部武選司員外郎

公在司凡郡縣解勾軍至部者公審其非正派不當充補卽給文遣發公役歸後乃給照驗放還以免里甲復勾之害於是不為役累者甚衆今大家宰陸公五臺偶談及遺事而公之事情行若此者非一二遺矣

十一月陞貴州督學僉事道經維揚納王孺人

敕貴州按察司僉事吳鵬今命爾提督貴州所屬

二十衛所屯田并各司衛所州縣學校兼理本

司詞訟一應屯田子粒照例清理明白督令以

時耕種依期徵納禁革收放奸弊敢有剝削軍

士侵占屯田包攬包糧拖欠不完者悉聽爾從

公追究量情責治應拏問者拏問如律應參奏

者參奏來聞仍依見行事例於各該屯所倉廩

蓄積預備米穀遇有饑荒一體賑濟所問囚犯

或有應追入官贓罰就發所司收掌候米穀價

賤收糴入倉以備賑給其各學生徒時常巡歷

考較備立條約嚴加勸懲令其熟讀經書講明

義理敦尚實行恪遵軌範痛革卑汚浮薄之風
每歲科貢慎選學行優等者起送廩增有缺從
公選補其有在學年深學問無成者照例黜退
生員之家優免差役及各學齋夫膳夫等項悉
照例施行教官賢否不齊一體嚴加考察果有

學問粗淺怠於訓誨者起送別用其貪污不才
實跡彰聞者就便拏問黜罷仍督各該提調官
員拘束生員肄業不許出外遊蕩為非學內殿
堂齋房等物損壞即令設法修理各鄉俱立社
學預選聰俊幼生擇立師範教誨以備生員之
選爾受茲委任尤宜正己率下恪共乃職務俾
屯田與舉學校整飭邊儲有備人材不乏斯副
朕懷如或因循歲月績效弗彰朕將爾責焉爾
其慎之毋忽故敕

嘉靖十二年二月初二日

贈吳子督學貴州劄

默泉吳子督學貴州將奉母安人往君子曰子
玉瓚也清廟薦之鞞然瑩矣茲役也歷荆沅望
泮阿母劬俗陋而教罔洽吳子其弗堪也已於
是部察二十有二人勞之崇文之郊吳子方攸
攸如也翼翼如也前岡子喜曰吳子其大成哉
攸攸者心逸翼翼者心小心逸則無不足心小
則思以勝之是故等明而教立吳子曰何謂學

明而教立也曰求諸心之謂學責諸已之謂教
夫天高地下體斯昭矣齊降不息而呼吸生焉
是故凝神息慮而非內也肅接應會而非外也
博習修辭而非侈也居敬主一而非寡也下仁
取善而非卑也獨行廣譽而非高也志乎德之
基乎知乎善之牖乎基固則定牖徹則明定而
明安而遷幾而變矣故曰喻而民知信色見而
人知恭魯人有業縞屨而之極者越人跣足被
髮或曰子必窮矣魯人冠圓冠履舄適之都會
之墟越人見而駭久則洵且從之故曰自勝之
謂強自見之謂明子言之天何言哉詩云豈第
君子遐不作人三皇之世不言化五帝之世不
言治三王之世不言功桓文之世不言刑是故
古之政也者正也教之則也今之教也者法也
政之蠱也志意格於等威精神耗於佔俾懼怨
生於夏楚賢否混於甄別故人疾其師而苦其
學之成也昔李悝守魏欲魏之善射也下令曰
有狐疑之訟者射的中者勝不中者負於是人

爭習射而魏因以強是故鼓舞之道存乎幾趨
向之旨生於習東郭之田耕則穫否則蕪土者
師之田也悖典以疆之明義以播之遜業以耨
之豫禁以弗之故沃以褒之譽登以薦之是故
道張風移而天下肥夫師之道大矣哉記曰能
為師者然後能為長能為君也故師有君之尊
焉有父之親焉尊以蒞之而道立矣親以說之
而化孚矣吳子曰子之言良矣貴則未可以有
為也前岡子曰奚為而不可也昔先師王子之
承龍場也身倡道教而興者數十人予之說師
也子之官則憲也辟之登高而呼而應者益眾
矣是故慈母之帷無踣兒玉工之肆無磔石子
欲居九夷者言人無不化也曰然則有益聞乎
曰念終始典於學
前岡胡經敘

十二年癸巳春正月南還秋七月黃太安人卒

先是公被貴陽之命中朝以冰未泮緩王程期
於是公暫抵家是年春二月行有日矣會黃太

夫人疾作不果專事湯藥累月不解衣帶竟不
延公哀毀骨立既葬復廬墓側逾大祥人不見
其齒族黨稱孝焉履菴公僅有所遺產及器皿
分屬諸弟妹而獨持一鏡曰吾早晚如對先人
面矣
分券附左

默泉子鵬為義處田產事今與吾姊吾弟吾妹
約自吾先人攻苦數十年以至於老且故止遺
下田一十六畝坐落秀水縣象賢等都吾係嫡
長子幸賴祖宗餘蔭竊升斗之祿於

朝不欲復分吾弟尺寸之利今悉讓與吾弟又
念吾姊始嫁時吾父與我俱未遇家素貧約無
所贈今以為恨須量撥田數畝以盡吾心又不
當獨遺於吾妹今將前田分撥雖多寡不齊揆
情與義自謂至當吾弟及姊及妹照數收租辦
糧當差永念吾父母之遺愛與澤蓋一毫一忽
之微皆吾先父母經營辛苦得之者無視以為
易易也久後不許變賣亦不許徇私忘義致生

爭端倘日後各自勉力成家與先人爭光多矣
湏至約者

計開

一則五升五釐絲田五畝坐落象賢二十
二都西區辰字圩沈文江田東至車浜西
至濮田北至王田西至浜正德十年置價
銀五兩租戶鋤方租米五石
一則五升田五畝坐落象賢二十二都西
區辰字圩馮倫田東至朱田南至王田西
至浜北至楊田正德五年置價銀八兩
錢租戶石文貴租米四石七斗
一則五升田六畝坐落象賢二十二都辰
字圩十六册沈宗政田東至本戶西至張
田南至本戶北至張田正德五年置價銀
七兩三錢租戶池海租米五石五斗
一南頭和房聽五叔之子承住不許變賣

嘉靖十五年十二月

日默泉子 臚

正

知見林雙峯 龔良弼

十三年甲午冬十月奉黃太安人柩於履菴公之

墓乞侍御雙湖戴公經合葬銘

里中無俚欲以詛咒潛置地中為嫉妬計公聞
叩於神問之訖神云老夫人宅心公恕博愛無
私村夫愚見反自賊之於公何損且公
有大德天有厚錫因命其祠額曰厚錫

冬十二月一日子緝生

王氏

十四年乙未冬十月服除

十五年丙申春公之京秋九月改除廣東督學僉

事

勅廣東督學僉事吳鵬

朕惟自古帝王治天下者率以興學育材為首務而學校之興廢人材之盛衰治道之隆替輟焉此蓋已然之明驗也今特命爾往廣東巡視提督各府州縣儒學爾其欽哉夫總理一方之學汝是即一方之表率也然率人以正必先正己行其務端軌範嚴條約公勸懲俾為師為弟子者一崇正學迪正道率浮靡之習振篤實之風庶幾儲養有素而待用不乏斯足以稱簡任之意如或因循歲月績效弗彰朕將爾責焉爾其聳哉所有合行事宜申明條示於後其慎行之毋忽故諭

督學廣東敘

道林子友於海石子而聞欽泉子之賢心竊慕

焉於茲三年矣始獲一接於部寮之宴再見於稅駕之館既乃私歎曰夫今之賢者也吾見其有餘焉而已也未見其或不足也今默泉子聞闡乎非章也訥訥乎弗辨也早乎常俯而退也其於道也幾乎哉或曰默泉子督學使也今之語督學也工文詞則賢博隱僻則賢輕銳豪逸則賢于獨不以是求默泉子然則今之語督學者皆非邪道林子晒曰甚哉是吾惑也夫督學也者以督天下之學焉者也學也者學夫天之與我也天之與我者理與義也故理義者生民之命也督學者理義之楨也楨不楨可乎哉是故心得理義是謂有德身服理義是謂有道唯忠唯信是謂可與人追德求理義之楨於道德求道德於忠信是明王之所以治也吁久矣滋吾惑也曰然則文詞將無取乎曰理義人心也有理義之心斯蔚乎其有文詞矣惟不出於理義者吾懼焉耳無何默泉子有廣東之命道林子喜曰理義之昌也其有獨盛乎哉廣

東古越也自白沙子闢其門其泉子循級而履
理義之學炳如也默泉子今復督學其間非其
域獨得天地之盛有是耶故茲往也乘天地獨
盛之運明二先生獨信之旨成一方翕然望道
之才楨理義以植斯人無窮之命夫然後天下
乃始信默泉子望之而如不足者果哉其中有
餘而幾於道
冬初十月 道林蔣信敘

冬十月二十九日子紹生戴夫人出十一月抵家

十六年丁酉春二月公視學廣東

分差提督學校廣東等處提刑按察司僉事吳
為申明學政事照得當職忝以疎庸欽承
上命提督嶺南學政夙夜祇懼慮不足以表率多
士稱
任使今當蒞政之始敬與官師諸士子約而後
行事不敢苛厲以刻亦不敢姑息以弛所冀官

師諸士子各同心遵守通求厥成無負
朝廷委任作養之意庶幾本職亦賴以塞缺曠之
責所有條約事宜各行申明仰抄案回府着落
當該官吏照依案驗內事理備行各屬州縣并
儒學及衛所一體遵守抄案及承行官吏各具
奉到日期不違依准各另繳來
計開

一聖賢讀書為政之要修己治人之方義利公
私之辨具載經史而

勅立碑提學

勅諭及節年提學憲臣申明教規丁寧告戒至精
且備嶺南以文獻著稱諸士子耳目漸需自
得於鄉前哲者又日以深本職不欲數更事
端及為多岐之論以瀆諸生聞聽所著規約
數條蓋亦稍加修飭補前所未逮者各宜篤
志力行毋自暴棄
一科舉之文自有定式作者雖豐簡不同要之
平正通達弗違理焉已矣近日為文率浮誇

怪誕艱深險澁剽竊鍛鍊於一字一句之間
求諸聖賢立言微旨多相背馳顛乃訑訑然
自負得意此不獨舉業之弊其學者心術亦
可知矣今後生儒作文俱遵
勅諭務須典實平順說理詳明敢有仍蹈前弊者
痛加黜責

一讀書生徒資質有高下工夫有生熟不可槩
為起止虛費時日教官悉依常規責其身體
心驗講玩精熟週而復始若性質穎悟立志
不凡能旁及他書者不在此限本職取文悉
據朱子傳註如有棄置不讀押侮聖言自出
意見為說者雖使能文亦在必黜
一學莫要於端心術夫學也者所以求治心也
學雖多而心不治安以學為況心術苟壞雖
有他美又何足取諸生固有立志高遠操持
堅定不受變於俗者亦有棄人倫違禮濫競
財產害鄉里挾制師長出入公門教唆詞訟
保舉官員荒迷酒色耽嗜博奕或傳歌造曲

毀謗士夫或岸瀆裸程遨遊市井者有一於
斯皆壞心術今後府州縣提調官督同教官
各照舊式置二等簿備參事証後實開填限
半月以裡封解查驗施行以後半年一次開
報各該官員務秉至公毋緣小嫌得假手報
復無事姑息致賢愚混淆此亦見提調教官
之用心臧否不可視為末務

一今後教官除升堂講書照舊規行外督令各
生每季置竹紙簿一扇長一尺二寸濶一尺
大約每月已成材者作四書義三篇經義三
篇論策各一篇判二道詔誥表一道未成材
者作義八篇論策各一篇其次者每日破對
各二道做書二張不許抄錄雷同虛應故事
諸生與同志者或五七八人或十數人各自結
會擬題作文備書會友姓名於簿殼面每
季終送教官批點仍給各生收候本職按臨
考試發落之日親自齎執聽查以驗勤惰決
去留

一 欽條到日限半月以裡各提調官督同教官
照依發去式樣刊印鮮明將該學是在并下
夏事故生員年籍經書三代牌色入學年月
歲考等第有無科舉補廩補增及停革緣事
丁憂患病考復等項各照年款日期逐一填
註明白裝成方冊火速送道查考至臨考之
日仍將應考生員開已未成材另造節畧揭
帖送考其丁憂緣事患病等項亦須於揭帖
內開具不許朦朧冒漏差錯違者究問以後
該學但經本道考試畢自即將新舊生員仍
照前式填開一本繳報
教官為入模範必須端已以格物忍貧以養
廉毋計較束修毋舉放私債毋置寧縣印毋
營求差遣受賕壽政政壞廉則如果移跡著
聞定行拿問其次職業荒廢者重加懲戒以
勵將來果有學行茂著能舉職者除優禮外
不拘資格一體旌舉如各學掌印官缺有司
擇本學訓導一員器學與職各開報恭本學

全缺許推別學一員申奪其給由應聘會試
轉選丁憂等項該提調官勤無違碍俱要申
呈待報施行
射禮冠婚祭禮社學鄉飲酒禮關繫風教
甚重須照例着實舉行候按臨查考
一 奇令宜以興學育才為首務各宜遵承

憲綱
勅諭奉揚
德意

毋先自絕本原凡遇該學殿宇廡舍牆垣損
陋須隨宜修葺俸廩齋膳門庫等項須隨時
僉補給發師儒老病憂患力不能贖及科貢
二途應起送者須隨宜處分照常規加厚下
學須與諸生講書討論道理季終須親自出
題考試分列等第榜列明倫堂量行賞罰毋
得假手教官聽其私家臆錄塞責仍將考過
一等優卷速各等案驗候次月十五日以前
封解本道查考其無故不預考申呈查究
其州縣提調官若缺正官而署印官不係科

月出身者會同教官考試若提調官於學校
勅諭有違非予所願於有司者也

一考論鄉賢名宦二祠應否舊以學校為公論
所自出之地舉保多由師生徇私泛濫不可
謂無若入其跡困無由上達者亦不可謂無
若入提調官教官督同素有等行生員備將
二祠近年應祀而不得祀不當祀而濫祀者
博考傳誌等項或錄全文或撮詳要類造方
冊繳報以憑修正其孝子順孫義夫烈婦貞
節實行著聞者按臨之日師生從實開報責
令有司立石書扁復其家或為奏

清旌表若布衣之士清修苦節通曉禮樂兵刑律
曆筭數及九十以上高年有德者亦開報以
憑延訪禮遇
各學置稽考簿二角厚簿隨宜長闊方一尺
兩寫某府州縣學某年某季稽考簿送提調
官印鈐發學每月每月遇有生員丁憂患病

事故補增補廩入學復學病痊應貢給假等
項并奉到事關本道一應公文逐日標記明
白每季終一存學一解府類總解查

小衛所應襲子弟候按臨學印官申呈送學
肄業除習舉業者外其習武藝者亦要講讀
小學四書知忠孝大義提調官教官一體教
訓候本道查考照例施行

一 起復廩增附生員本學取隣里同學結勘明
白送各該府州縣提調官當堂面試先令本
生復學原係廩增遇缺即補雖新增考居一
等候補者不得攙越一面封卷送道附查若
服滿後無故遷延三箇月不起復有規避者
申身提究其曾經停降未復者送考定奪
一 生員有犯除惡逆重大事情有司徑自提問
若被人牽連挾制先審証佐果有干礙申呈
待報施行如奉上司明文坐提者一面解發
一面申呈本道知會事完之日不論有無罪
名俱要抄招回報

春秋禮記讀者甚少今童生能習讀二經略
知出處行文者按臨一體送學肄業有欲以
二經教授各府者亦准如各學缺少合項書
籍卽查缺稟齋膳夫銀學田租稅等項明白
造報以憑覆查給買或爲貧不能婚葬者之
助毋得隱漏侵欺取罪
一歲貢事宜奉勘合已照舊規外俱於二月
初一日始至十月以裡查勘明白陸續遞送
赴考以食糧多寡籍名先後爲次如正貢丁
憂扣該十月終服滿者查無違碍留候遞送
正貢患病未痊停廩未復緣事未結過限者
該學將次名結勘無碍充正起送其開糧作
缺以領硃卷文書日爲始已經考中領文武
遇丁憂患病去領布政司批文亦係貢出入
數有司候其服滿病痊起送不許欠名覬覦
謀補其久病在家中途病故及或痼疾養親
終身不起者查具先後事例將應補生員申
來定奪

儒士願科舉童生願入學者各該提調官嚴
加考選與生員一體相待不必令其自備卓
堯以傷上氣仍預取都圖里老審勘年貌籍
貫造冊候按臨一齊送考取聯名十人以上
互相覺察並無詐冒籍貫頂替考試及隱匿
刑喪過犯結狀在官以防日後有犯連坐治
罪其不由有司考送徑自赴道告擾者重責
一教條到日府衛州縣掌印官卽將佐貳首領
并所屬大小官員歷任脚色開具揭帖親填
考語其教官賢否尤須詳備據事直書不必
牽合對偶及苟且塞責限一月之內密封差
人齋報以憑訪實無違
一各府州縣誌書并古今翻刻書籍俱印奉一
部送道較閱原無誌書者申呈審處
一進取告願退閑者聽或年尚少壯先因學問
不充曾告衣巾終身近月進修有益告願復
學並不係行止有虧者聽皆於按臨未考之

前有司預為申達裁處發落後告者不准
一科舉年分監生并衣巾侍親生員軍吏人等
有志科舉者俱赴提調官處與儒士一體考
選送道覆試

一按臨之日除應該防護迎接者照常外師生
送迎俱於郭門伺候毋足恭以壞士風其供
億自有廩給有司不必稟送下程亦不必結
綵鋪壇為無益之費下學行香知府而下照
憲綱序坐不必過為謙讓所司務要相信免使上
下多勞辭說

一密其各門鎖鑰總盛一匣候按臨送入驗收
各巡捕官嚴督兵快火甲人等晝夜巡視不
許縱容姦人探聽巡風官吏并隣牆居民先
具不致通同作弊重其結狀呈遞事發一體
問罪

搭蓋蓬席俱要牢密軒敞卓凳務須整齊東
西背向相去二尺許以竹皮相聯綁縛卓脚

以防攢移每卓設鎮紙黑油木尺一方水盞

一箇其試卷筆墨與硯諸生自帶甬路近傍
遮搭席篷東西相向置溺器於為山恭所
生員未入時將供應精潔餅食鮮菓隨宜送

司分置卓上先一日預辦鐵爐錫壺茶椒柴
炭茶盞水缸送入驗發內班皂隸煮茶供飯

一試卷用一色厚白紙劄以卷之長短分別已
未成材依式摺疊前真後草正縫印鈐上眉
虛一寸三分下虛一寸面幅餘紙從後摺轉

與卷後面取中粘聯用印鈐記是廩者上寫
廩字停廩者寫停字增廣與廩降增者寫增

字附學增降附者寫附字青衣寫青字寄學
馬寄字發社寫社字儒士寫儒字監生寫監

字衣巾侍親馬侍字教官教字字皆如指頂
大正面摘取各府州縣分一字編號如廣州
府則云府廣字一號習其經如南海縣則云

縣南字一號習其經自一以至二三四百盡
生徒之數而止州衛皆然空下不具姓名候

發落日生徒自填編完先一日給散各生收執聽試有司及教官用心檢點勿委吏書致有重號重卷之弊號簿提調官封貯後查教官一體聽考其試卷與童生試卷不用編號正面俱直書姓名裏幅書年貌籍貫并三代脚色惟願科舉者仍用編號

一考試之日堂簷下設雲板一架儀門內設木魚一架當堂疊一高座居中以便顧問有司將入試生徒姓名用二寸濶小票填寫先一日送粘卓上候試日唱名序坐生員儒巾青衣布襪草履提調官自大門外點齊從東西旁門循序放入巡捕官帶領兵快三三十八人

大門內搜檢不許夾帶片紙隻字教官於儀門上東西分立導引各生就位隨卽俯首端坐聽題不許稟告出題難易有左右睇視私相告語者扶出日脯不完卷者扶出決不給燭欲飲茶在位起立稟云告飲茶欲出茶者云告出恭隨執試卷出位交於案卓上然後

飲茶出恭畢領卷擊雲板一下復位其餘審聲以出二人不許並出一人不許二出違者俱查印記於發落日責治

一各府州縣衛置門籍一本遇有生員出入衙門不論事之大小情之公私俱從實填註每季繳報

一考試合用經書通鑑性理等官書教官先期送覽事後領出

一府州縣預置書櫃一箇高濶隨宜大約可容三四百卷內開六空前作一門鎖釘堅固聽候應用蓋書櫃比卷箱敞閉檢藏爲易耳

一應辦筆墨花紅紙割柴炭油燭等物支給官錢收買事完備細造冊具不致科擾結狀候

一前任提學道考過廩增附生員其停降有期限送考者扣限滿送考

一前生員考居一等文理平通者增附俱補廩二等文理亦通者增附候補廩三等文理畧通

者量賞原停降廩者俱准復與二等新增相兼收補四等文理欠通者量責五等文理疵甚者停廩降增作缺附學發社俱限半年之外送考奪六等文理不通者廩增十年以上照例施行其餘黜退為民

一 考過補廩補增入學生員案到次日教官即與收補具由繳報毋勒指遲延以招重罰生員臨考告病者教官先拘本生家人并隣佑醫士同齋生員取的確供詞具不致虛詐結狀申報限一箇月內教官伴送按臨去處

一 試日各提調官選委能書謹慎吏每學一名受卷立於廳柱東一名掌照出牌立於廳柱西公座前置箱標記某學明白遇生員納卷受卷吏接卷呈上驗箱投入執牌吏給與照出牌生員執牌由甬路至中門守儀門吏驗牌放出俟足十人儀門吏繳牌隨擊木魚三

下巡捕官吏開大門驗放一應人不許放入違者重治

一 士當培養氣節為他日樹立根本昔人以蔡人勤習戴記而欲歸鄉應舉者程子謂是心已不可入堯舜之道况可干求請謁奔競無恥以自同於小人也哉當職雖才不踰人立心頗直去取一以公道必不容私諸生各宜相體毋得自取卑辱

一 門厨皂隸等役須選用朴實之人許帶五日柴米首領官驗過將入食用掌印官仍取各役的確姓名籍貫不致作弊結狀引報其合用器皿先期預備至日不許送入

一 本職自揣無他長惟虚心二字敢於自信凡我同志宜以心相體倘本職政理有乖當明白稟告申請自行改正毋得依違於其間嘉靖十七年三月 日

秋七月公試諸生三千人應鄉試

是年中式者馬拯等七十五人皆公所引拔錄文並出公手

十七年戊戌公試諸生按行雷廉諸郡

是年南冢宰霍公翰移文北銓汪公鉉以公秉公持明正身範士當有不次之擢於是大理丞缺咸欲以公名應焉然汪以此郵謂霍第當以尺一推揚何至移文北曹是為分北曹權耶會有同鄉在司忌公次不遷轉

十八年巳亥按行瓊崖諸郡

三月家慶集成

公每念履菴公生平歷履式穀貽慶手錄其繫付劄劄氏以志永思題曰家慶集家慶集跋竊慕履菴公之為人不及於門北隨牒南海維

特諸生中有頌菴公行者逖聽風聲不其然乎未幾默泉公督學東廣科自慶獲侍門下猶侍履菴公也茲覩厥集章美者五焉振材助化經政也立孝致友淑行也周急抗義表俗也知足遠引達節也斷機膽丸之訓昭聖善也夫慶之道匪儲靡豐匪衍靡長作者儲也述者衍也豐者兆天禎也衍者侈人瑞也科聞默泉公卜白芾莖適產粟與夢符焉禎也公瑞也作述耿光慶固未艾也科因以示諸生諸生輩曰信乎若前聞也使叔譽九原之嘆其歸履菴公乎仰高山而歛歔者重所感經祠墓而徬徨者百世

秋閏七月

張科跋

九廟大享禮成覃恩進階奉政大夫封戴安人為宜人贈履菴公廣東按察司僉事黃安人宜人

是年

廟告成

草恩內外百僚封如公官

奉

天承運

皇帝制曰日朕肇舉郊儀恪修宗祀荷

高靈之降格慶熙事之涓成惟予臬臣之親宜燕

神釐之昨爾原任河南開封府長葛縣儒學訓

導封承德郎工部都水清吏司主事吳方乃廣

東按察司僉事鵬之父孝友忠信踈爽磊落幼

負奇資長稱博雅顧以不遇之故出為儒師勇

退而歸迄終所學訓成令子振美登科往歲水

部明庸已膺褒命茲以外臺布慶荐被渥恩生

榮苑哀一時鮮儷是用加贈為奉政大夫廣東

按察司僉事尚克承之永綏胤祚

制曰古者賢母之教其子云入則致孝於親出則

盡忠於君以無貽父母憂茲惟母則朕寔罕聞

爾封安人黃氏乃廣東按察司僉事吳鵬之母

教為上望德為女師勤儉溫良乃著相夫之績

莊嚴慈慧終成訓子之名曩爾子就列夏商榮

膺祿養頃者令終壽考復易贈階聖善之功揆

此益顯特用加贈為宜人惟爾明靈服茲休命

奉

天承運

皇帝制曰朕簡文學之臣分領憲車督學諸路將

以興道化育人材可謂重其任矣自非明經而

尊道德者不與此選爾廣東按察司僉事吳鵬

育德慎修遜志典學往歲偕計來上朕嘉爾術

業醇正首試起曹踐更司寇司馬惟爾翱翔三

署永肩一心濟漕明刑本兵諸務惟允無愆爰

稽歲勲擢僉貴臬既執政者言爾清廟之器不

宜遠在遐徼乃遷嶺臺俾視學校肆爾表率以

正敬敷在寬力除浮靡之風茂著端純之化五

嶺人士式儀刑焉茲以

入享覃恩特進爾階奉政大夫錫之誥命其尚少

安以俟殊擢

制口凡我臣工顯力以事其上是有中饋相之寵
接之典不加何以爲勸爾廣東按察司僉事吳
鵬妻封安人戴氏生有茂資不勤姆訓擇配哲
士克諧厥美孝勤恭儉雖貴不渝觀爾夫子勵
行敷文揚休臺轄爾之相助可徵也茲特加封
爲宜人往服贊書益修壺教
嘉靖十八年閏七月初五日

十九年庚子公試諸生三千人應鄉試

先是巳亥冬公例得給由天官氏矣會十道使
者以公精鑒賞持風裁嶺表士習爲一變彬彬
質文幾鴈行齊魯而鄉舉迫仲秋復難其代交
章留之若兩廣總督蔡公經奏云提學僉事吳
鵬性資沉毅學問淵醇志行素重於鄉評立教
允孚於士類御史洪公垣奏云吳鵬行著於平
居而身教端學優於素養而師道立以故是年
再歷校士最奇蕭來鳳文置第一俄而來鳳領

舉首人
士服之

秋九月公考績北行

先是九月終旬公以考績北行士民俱不忍舍
省中老幼皆泣送士大夫有文紀之
視學東廣敘

予嘗揣摩宇宙考覽今古曰嗟乎經天紀地莫
國濟時敷化垂範莫大乎師何哉師也師作善
善作則在選邇格丁上有道是故藏於野則信
民舉於朝則吉士古云師道立善人多天下治
非誣也

明興聖作百六七十祀化遠治昭颯颯乎皇皇帝
帝之世也其間抗顏服禮爲世師彤管所載錄
博乎泛濫矣吾於東廣得白沙先生焉每讀先
生遺書心神超越輒拜稽首曰吾師也既釋褐
南宮日侍今南文部尚書聿泉公公時時述自
沙面肯綮語聞遺書之不能載若觀白沙之貌

豫而窺室家馬則又拜稽首曰吾師也今吾鄉
默泉先生拜按察僉為東廣師表東廣自沙其
泉二先生之鄉也今其鄉之人服習二先生之
教若飲食裘葛非特縉紳先生為然吾嘗見蕃
將廣州人馬全興於二先生之風循循彬彬益
蕃身而華心者矣將名南儒實者矣二先生之
風於時遠矣吾默泉先生忠信好學者也其於
二先生之教默而識之是故少冢宰用州公雅
重而薦以師廣之人
天子可之僉謂廣得師用州能用師
天子重師默泉自此善師或曰默泉之善師也其
道尚矣見其構文也則蘓黃也見其琢詩也則
鮑謝也非徒如子云忠信好學為能善師也海
石子曰子以忠信好學為不足盡默泉子也夫
孰不學以忠信基之以為學聖學也白沙之為
白沙其泉之為其泉忠信學焉者也東廣服習
二先生之教服此習此也默泉以此風之神交
精會師道之功太哉淵乎不可及矣今有入當

席而論曰蘇黃其周程也鮑謝其顏曾也衆掩
口竊笑曰擬人何失倫哉是無臧否之心者也
又當客而論曰爾為學為蘇黃為鮑謝爾為學
為周程為顏曾則客之見目為蘇黃鮑謝者必
面赤發怒曰何卑吾也今子之善默泉子也以
蘇黃鮑謝吾恐默泉之面亦發怒也於是或人
拜稽首曰予鄙人也見天於井按劍於株者也
豈知蘇黃鮑謝之上有顏曾周程徒哉自今將
盡棄其學而學焉則曷師之海石子曰師默泉
子於是或人往師默泉子海石子又歎曰世之
稱豪傑頡頏雲霄之上每俯視醒覲則蹙額將
逝焉乃其心於蘇黃鮑謝如宋人以賈島為賈
佛者而或人獨不難於棄其所成以師默泉子
是忠信之心未嘗去人也歸而學焉如或人誠
足嘉也且慶默泉子之能師二先生而又師其
鄉也若或人者先得二先生之鄉之同然而倡
師之者也默泉行書以送之海石錢薇敘
獻績序

卷之九 六十九

督學憲臣今天下文學之妙選也今天下士大夫皆以文學進拔其尤而授之任則可以善斯職乎曰未也聽察精明然後勸懲不忒樞機詳審然後奇奏不奸其諸政事兼之可乎有其兼之者矣則可以善斯職乎曰未也好惡或偏則民聽靡適從表率或愆則品式爲文具要之德行其本矣夫四科之目孔門高弟莫能兼長也而以求之後世乎且也又有難焉如有王者必世而後仁今夫官守之蒞或五六年或三四年若是其亟也如之何其化民善俗也君子曰是有辨焉夫道久化成聖人不能易也舜之命契曰敬敷五教在寬固勿使速效也不曰屢省乃成乎不曰時而颺之乎故夫三載考績者惇典亮上之體而道久化成之助如日之有要月之有會以成歲功不日不月其何能歲豈以遲速計哉默泉吳子浙西之聞人嘗以夏官屬柄試山東號稱得士典議邦政時人服其鑒裁既乃陟廣東僉憲奉

聖天子緝熙敬一之學風動四方非得如默泉子數輩在列中外承流宣化之責將安所賴之昔者太公治齊五月而報政孔子曰齊之變至於魯蓋病太公之不革齊俗也魯公伯禽之報政以三年則已變其俗革其禮煥然一新之矣我廣風氣之宣期後於中州而太朴之蕩散亦後於中州冠婚喪祭皆遵先民之軌以自牖於聖學之途其於

嚮明之化沾茹特易淪洽特深而默泉子寔振德其間以堅其秀實而登其阜成三年奏績必為諸方之最無惑也抑吾聞多士不忍釋其師而撫臣部使者既皆轉以

上聞矣其將褒進成績寵秩默泉子於我邦然則惠綏我人士俾歸於於變時雍以弼成聖天子必世之仁者將非默泉子也耶

南海倫以訓敘

皇帝臨御天下於茲十有九年日惟明作勵精以教化為大務制若曰

朝廷正而天下治善人多也善人多師道立也廼慎簡在位學有典則往師俊造維是默泉吳公

寔拜茲

休命以僉憲吾廣敬學事也既三載考最於

天官遵憲典也君子謂是行也可以為公慶矣夫士君子之效官而樹績也以化所以經化也以政所以運政也以德故觀於其德而政可知矣觀於其政而化可知矣觀於其化而績可知矣

矣是故德者政之輿也匪德則推之於政也為無本政者化之經也匪政則章之於化也為無紀化者績之著也匪化則樹之於績也為無徵然則德以善政政以弘化化以樹績而君子之所以章志以貞教者曷維其已三代以下學之不講而道德之未一也其流也肆庸無懼乎矧誰我

國家以人文化成天下設學校聯師儒而復督之憲臣以慎重厥事責亦大矣任此者轉移化導之機其將是賴庸無費乎君廼惟德罔衷是謂身教之無良而下觀塞化庸無慎乎於戲政立而衷教章而迪德博而化績懋而著吾於公固有足徵矣蓋其量足以容公足以溥誠足以孚明足以照剛毅有執以無教於回邪是故可以觀德昭德以植軌罔拂人情罔飭虛觀罔求近功于焉日行其志以徐觀其成是故可以觀政茲政用不靡土用蹶興崇雅黜浮翕然以不變無回於嚮無疾於利無卽惰滌莘莘如也是

故可以觀化於績允有成矣其何弗達是行也
寧弗可以為公慶乎於時郡師高子寶輩以其
仰芘而延訓於公者深迺借其徒等徵言於予
以志公別予既辭弗獲乃遂言曰吾聞德懋懋
官功懋懋賞莫之有改也惟公崇蓄而浩施德
若功炳乎隆矣茲惟晉以奏績於
庭懋官懋賞其容違諸且以化久而洽多士之
得於陶鎔者亦既漸被行將翼我
明天子以登斯世於文明之盛由此其基也惟爾
名士豈曰其終得私大惠眾僉以予言乎而確
宜遂述焉故於是乎序

順德洗光敘

國家取士舍藝文而欲行鄉舉里選之法不可
得也唐史所謂汗漫無守也不沿古意不與古
學而欲以估畢之屬措天下於唐虞三代吾不
信也是故唐宋之不漢周而上之也三歲校薦
幸於春官以論上之天府咸以一日之文而曰
是必稽其實必本諸行是終誣人也然則其機

括在提學之司審士藝端士習正士志勸率
養沉浸薰積儲而待之下責庠塾師儒之訓上
克選貢後造之求皆督學官得為之是故在昔
厥任咸輕我

朝侍臨以監司之重且慎惟其人蓋謂是耳今
皇帝十五載命原任貴州提學嘉興吳公來

視學嶺南學政若曰惟粵多雋產惟汝慎成惟
遠服士或裕遜輕利見惟汝來惟剽棘眩是惟
華靡斷真之體滋壞惟汝正惟心術弗純學術
迺非端文茲迺漓惟汝厚本默泉至廣振刮滌
濯毅無遺力曰學不準古罔以理國法不遵今
其無繇以適之爰約諸司弟子誦法必孔孟莊
列以略罔淫於習傳註據程朱子母異異自賢
為文必理致爾雅不身體心驗漁拾黜險誕鍛
鍊黜淫哇妖曼雖回宮轉商弗齒諸禮切風教
者令著實舉行諸髦幼必謹習社禮曰令有守
最得關中意矩至治心允諄諄告戒曰是一以
貫母撥爾本根毋誹競毋跣跣夸毘毋埃制醜

荒是咸惟心防遇校大都以文間商之三等簿
且嚴諮訪或干之憲固惟勿貸其不躋於私不
倫類於家亦疏而汰曰是惟無良無賴於有邦
士美資材掖之進與語學理談天下故如家人
父子勵師儒官模範之而勤惰之而廉貪之母
枉縱行之四年士習丕變文體翕然純且彬彬
嚮之正夫文章與氣化相通亂世氣裂而文
衰治世氣完而文粹承平之世氣溢以流文肆
以蕩是故辨之早在識挽之潰在力然天地之
氣存諸神而顯之化是故學者之學蘊之為德
行發之為文章然則默泉合一之學之教之識
之力將使予雖不古法而復古治之說可效而
信非先生誰然詩曰維其有之是以似之維其
有章矣是以有慶矣先生之章吾觀夫人文矣
先生之慶吾將觀夫來朝之錫予矣往昔莊渠
先生倡古學錮於俗者說說不衰予嘗為著難
默泉且不改觀聽而行之裕如尤不可無言重
以司教徐震左承裕暨三百士之敦請於是乎

東莞戴銑敘

默泉吳公巨浙之望也德聲著洽遐邇五嶺以
南去浙幾千里而風聞人人極窮陬遠壤服者
殊眾自丁酉視學吾廣廣之士幸而喜者無遠
近焉矜與若吳公者豈易得哉其始也簡然無
傲恭然有容癯然如不勝衣再見之則矢言詞
博聞見抵掌論天下事若探諸其囊中而穎出
之者裕如也又見之則刊落其枝葉而本根焉
依不責備於瑣瑣之務其為教則匪先之其身
休休能容若無能窺其際焉因村而篤則各以
其漸成之若默泉公者豈易得哉屢見而屢進
進而未見其止夫子曰吾未見剛者孰意於我
默泉公見之耶夫人膺有職業之寄者將闡猷
樹勛以無負

明天子簡任之意若吳公者可以見
天子矣自昔董學憲臣作吾廣之士僅其於鄉
之薦之鮮有蒞其成者默泉公作人之效乃今

得具見之矣維茲多士凡百五十人皆聲馳雅素莫有出默泉公品題之外者廣之士論咸謂作人之深得人之慶莫有如我默泉公盛焉者矣譽豈造士俎豆莘莘有喜色功之及物者無既也是可以見天子矣庚子秋九月朔公方治行鄉薦諸士從邁追及者若而人屬予序以紀恐別之思予以病辭弗獲遂書之

望峯盧綸敘

皇上繼統中興勵精堯舜文明之治務以禮樂淑天下維時公卿藩臬咸祗承德意惟慎而督學憲臣則尤加之意焉蓋自

英廟肇之列聖承之其擢任之隆蓋莫之與京矣維默泉吳公端履遠蓄為世醇儒以臬大夫典學貴州再

奉

命典學於粵政成而獻績于大庭其門下上潘生文澤林生焯輩徵文於予

進而颺言曰生等受教於默泉公者四易禩矣側聆玄論親覩粹顏善誘循循不棘不倦斯蓋成我者之恩與生我者等也維茲榮行當頌以章德且無以我公歸者惟先生序之以慰吾黨之望予聞而嘆曰噫嘻昭哉諸賢之從默泉游也其宛然有洙泗之道風乎予昔日官游聞默泉之懿行於吳人者舊矣予更為我詳之諸士迺復肅而言曰夫自默泉公之視學也有廉德以靖官守有恒德以惇典刑有寬德以溥容蓄有聰德以攝荒縱有惠德以蘇寒士是故諸在門者回琴點瑟咸自鳴厥衷以樂從厥道日惟見公待人以和焉而未始厲之以威也繩人以正焉而未始浚之以法也導人以誠焉而未始崇之以飾也然公之盛德若是其忍忘我公哉予聞而嘆曰噫嘻昭哉諸賢之從默泉游也其宛然有洙泗之遺風乎夫官守靖則憲體崇矣典刑惇則憲綱肅矣容蓄溥則憲度弘矣荒縱攝則怠者飾矣寒士蘇則什者植矣是故善之

備也善以和政政以貞度度以昭信信以孚誠
 行將陟崇階位台密以光弼我
 皇上文明之治則吾黨亦與有永耀賢輩其念之
 哉維時諸士咸相餞於郊思歌以永言矢弗諉
 於是生綵陳生修若而人相與賦菁莪而疊
 以振鷺其誠觀樂育之深而慕德切至者乎符
 生渭蔡生瓊若而人相與賦棫樸而疊以菽芾
 其誠章譽髦之化而思德無窮者乎歌成而諸
 名大夫咸嘉之君子曰夫是舉也可以見上下
 之交焉可以見師友之重焉可以見天地之情
 焉然後知道義之裏回非世俗所能測也予遂
 倘書之以俟太史氏之採
 古岡區越敘

嘉靖庚子九月既望嶺南督學默泉吳公赴
 闕考績將辭五羊邑博番禹丘君鳳南海曾君子
 後借其門人楊生穗造予言曰子吳子知子也
 行則贈也敢以累子何子曰栢也久矣不託於
 文然默泉知余也遂與諸君廣論贈言之義楊

生進曰惟我默泉公飾範迪儀式我多
 附邑序薰育伊邇士以丕振咸被獨深用是
 思丘子曰惟公薰教若越五越厥載條矩罔亂
 惟是我庶屬及茲多士於法日久周乎遐暨為
 茲兩邑士曾子曰惟公主教敦寬愷容莊蒞
 育尚善無有疾遮凡我庶屬罔不飲德思感豈
 惟兩邑士何子曰伊邇之恩可以觀愛矣時久
 之徵可以觀恒矣飲德之感可以觀教矣茲行
 也可以贈矣抑竊有進焉贈也者增也九仞之
 積成於一簣海之大也總夫百川故言足益而
 後可助人足輔而後可言默泉公嘗過吾論學
 矣曰君子以心地為本以綱常為柄以義利為
 辨以不愧屋漏為功以雜而不厭為恒本端而
 立柄持而理辨嚴而切功密而真守恒以一學
 之至也舍此而學則偽矣又嘗與吾論教矣曰
 敬敷五教在寬曰師嚴為難曰師道立則善人
 多曰治天下以正風俗得賢才為本數者皆得
 教之至也舍此而教則舛矣學也者覺此者也

教也者效此者也學則教教則一道則而功濟也天之生斯民也將以斯道覺斯民也先覺覺後覺公之格諸庶屬咸爾多士其尚在茲乎其尚在茲乎或曰默泉公教成而去若越行以所教者移之治矣子何復以惑何子曰政教一也默泉行矣由此而理民由此而育士皆未可知也學則在已也易地皆學也皆學則何惑乎政教而吾之言則亦一簣涓流之助爾公往信哉公秀水名士也其邑有曰錢黃門海石子者吾友也幸以是質之

南海何維栢敘

虞廷三載陟明登良凡百司庶尹效功呈能咸其熙熾然各有司存匪用其極惟典學之責勿事章程弗紀課藝而收多策動反在群秩焉何也蓋治有本末時有後先化有握機效有顯微神而明之會通而行之兼總條貫而集成之盛德大業斯其至矣漢晉隋唐學有分職師無專員志別途殊各泥其趨或失矯僞或流支離則

不能一道德同風俗以嬖隆唐

聖祖準古酌時作始善則命憲臣督學分布畿甸

兼以明弼參之寅清立模董威聽其簡稽月書歲登入治出長而得人之盛迨將有二軼三者矣豈徒曰拔十得五云哉嘉靖丁酉春大憲伯默泉吳老先生臨視廣學謂茲元公過化先民有作陽德攸鍾士類可新乃躬以飭範心以達猷訂頑立懦崇雅黜浮紀善有章文優有錄久任觀成兩薦賢書羣聯制科其闡必有淵篤以鎮雅俗嚴明勇決以宰牧郡邑有剛方華藻以備諫掖詞垣則不必家喻而人迪之天下陰受其賜多矣茲當績最臺院交致褒稱則其被旂常勒鼎彝豈俟言以揄揚之哉方今聖天子憲學右文時幾日靖思得明通溥洽之臣以供御筵而

皇太子始學青宮上親而貴仁思得端莊誠懇之臣以資輔翼公既能以人事

理學淵源真能溯濂洛之派者夫山靜而清作
聖功也源泉混混示學進也淵泉如淵昭存誠
也是故至道不器至禮不容至教不言至治不
以爲功默而成之存乎德行焉耳昔后夔典樂
教胄繼登保衡契敷教四方竟留端揆公將內
柄不復來東矣文游造化之中固知公涵天下
以爲度者故敬以幸輔望之非敢面諛云作至
績篇

王希文叙

我宗師默泉吳老先生大人之董學政於粵南
也越三載已於事而竣維時士競於教力於道
其於文章彬彬也咸去其軋茁之習而溫醇爾
雅薦紳先生莫或病之劉子曰八音與政通文
章與時高下世以爲名言余以文之高下雖係
於詩其時之所風蓋上爲之也昔者歐陽子倡
古文而天下之士從其風故東坡南豐輩皆一
時之選也相與爲之和至今言文者歸美焉今
公以古文倡南服南士其風矣而今而後獨不

有相與爲和如東坡南豐之於歐陽子者乎郡
之雲龍風虎之相從其所感者然也易中孚之
九二曰鳴鶴在陰其子和之其是之謂也夫曷
不觀今之吾雄乎雄居粵上游風氣朴野其士
之游學校而膺科舉選者間或有之不得與他
州較焉豈陽德之炳耀獨發於芬葩環麗而罕
鍾於人如昌黎韓子之所怪者乎以今之觀吳
公韓子之怪未足徵也特上未有以倡之者耳
夫以雄之文士科舉落落自公一倡由科舉選
者夙科丁酉譚子大初出焉隨登進士第經今
庚子汪子一勻又捷報矣君子曰詩曰豈弟君
子遐不作人公之謂也夫以質之不材而叨忝
屬下素幸教於左右故於公之行也思欲器公
而有不能者謹效一吶於左右曰刑以弼教教
以期刑於無刑也公昔居秋官爰制百姓於刑
之衷因以主刑遷今職今出而主盟斯文也多
士嚮風無或闕茸於其間又滿職矣今之行也
朝廷其將有大任用者非公而誰故敬以榮公行

且以道吾屬欲留而不能之意以洩吾思
王朝賓叙

歲在丁酉恭惟默泉先生以

明天子命表儀我百粵士維老先生正躬麗則敦
本黜浮崇禮以明讓建德而懋中徽人典與常
行尊五教明十倫厥維今論文詞固不平和以
布既而陳之以忠信昭之以莊敬律之以中王
無邪其有傲怠不敬者適示之譴既而度以相
信道以相守德義以相融履禮和樂以相煦其
有冥頑而教不率者始斥之不得與弟子員列
是以粵縣之士聚學而興行力本而植德所以
謀夫潤身而及物者罔不益克其所養是則先
生之教之敷於多士也始而有孚既而漬延以
洽越迺三載其化大光跡諸昌黎坡翁之澤寧
不可以肩美而流聲也思齋之詩曰肆成人有
德小子有造古之人無斲譽髦斯士先生有焉
於是弟子員天諸歌而揚先生之德其辭曰泰
山兮崔嵬峻曰兮光輝猗美人兮泰山之高兮

皎日之麗兮泰山兮翹瞻奕奕皎日兮照映無

極何美人兮下土之式曰有美人兮水玉之姿

懿德貞兮君子之師錦繡燦兮胷中之奇廓無

涯兮大度怡怡我後生兮爰得所依曰瞻彼鸞

鳳兮棲於高岡寄我好音兮時聽笙簧有斐君

子兮類靈鳥之翱翔故我人斯兮豁昏侗於冥

茫曰有美人兮浙土之英程伯子兮主色金聲

純粹精兮渾然天成展我師兮斗山明明曰猗

先生之稟兮會天地之精猗先生之德兮簡程

朱之情猗先生之器兮抱韓范之禎猗先生之

華兮將齊伊召之名猗羣子沐化於菁莪兮長

具仰乎日星或曰先生何以獲令譽於多士也

韶曰德之盛者其化隆恩之深者其愛永韶嘗

侍諸先生嚴而不峻裕而不流廉而不刻介而

不拘直而不迂易而不洽昔人所謂追琢其章
金玉其相勉勉我王綱紀四方先生之德可以
俾光矣且先生以堯舜待其身而日以堯舜之
道望於人誘迪循循終日弗懈胡安定魏太宰

之風猶有存者而賑貧助喪獎賢重德又見諸
上用之施行則夫景行者順德徙義者達材邇
遐賡歌而頌先生之教不衰夫豈溢美也哉於
是或人賦隰桑之末章詔不佞請述而識之

趙公韶敘

惟孔孟還而天下無人師程朱逝而後世無勝
學漢儒唐文未知統一中間借師承以自售其
支曲者不知其幾也或失則私或失則僞或失
則激以是賈禍以是傷化而終以圯天下之
者又不知其幾也默泉公先是督學貴州中以
憂移家繼督學吾廣士人瞻依如七十子之
孔子也公蘊醇紆粹體道不陂君子尚其誠和
衷普物恬淡不亢君子尚其度本是以作之
可以為聖人主是以成之學可以為君然則今
日之稱人師者非默泉公而誰公將積官成入
獻廣人戚公之去皇皇若失怙恃此恐非知公之
深者夫公蒞吾廣僅四載然德教之遠將軌諸
百世也廣之士頌鄉薦百五十人其以歲薦者

莫既焉然作人之盛殆盡吾廣人也兩省之士
豈堪縻公移是而表率國學以風被天下可也
然則公之去也猶夫留也亦何戚也公且行南
海郭上維藩韶州黃生城廬守俱沐公教誨獨
深方奉鄉書隨公北上念公今茲之行所繫甚
大聊著一言以紀淵源所自云

郭維翰序

督學默泉吳公既別五羊之明年寔拜廣右藩
議之

命衆聞之嘖嘖然曰默泉子之久於越也績著而
望隆宜其論稱以懋晉也迺今而陟之微視地
而且僻焉默泉子其慊乎哉或曰不然士之仕
也隆汗伸縮遇惟厥時顧自信何如耳大道之
行也布公昭明下法上揆章善癉惡莫敢或忤
是以百司竭力盡知爭相磨濯而以赴功及時
趨勢激鑽伺橫而廉耻貿亂舉措奈而賢否混
淆是故賞靡而不足勸也爵瀆而不足貴也嗟
夫道隆而登顯者榮之凝也時替而進驟者辱

之臨也榮辱之招不可不慎也夫桂林荆楚之
域而賓封之善陬也由漢以來則隆乎躋矣若
得而鄙夷之則在昔泰伯遁居周公所懲迺今
吳越荆舒之區揆此初無以異顧亦得而薄之
耶矧默泉自信不違茲而銀綬章章綬符赫赫
裒然而宅方面視世之坎坷却步者不可謂不
榮也谷有過予古林而道或人之言古林子曰
言美矣而未盡也士之自信也為其有貴於已
者也趙孟之所貴趙孟能賤之士而至於使人
賤之陋亦甚矣天地間有至富至貴可愛可求
而異乎彼者見其大焉爾見大則心泰心泰則
無不足素位而行不願乎外如孔之乘田委吏
可也司寇司空可也行乎患難行乎夷狄亦可
也如顏之不改舜禹之不與亦可也今夫龍之
為物也能大能小能飛能潛能幽能明方其蟄
也魚鱉與伍亦或可狎而騎也及其襄首奮翼
感震電而上之則浮雲出游霧雨咸集騰不終
朝澤沛萬里而未嘗有加也君子之道塞而不

曠泰而不盈其猶龍乎客悅曰吾今而知人之
所以為龍矣既去而語於退齋林公公顧予曰
言盡矣默泉吾友也蓋嘗從事於斯矣請以予
之言為賀
南海何維栢序

冬十月陞廣西左叅議

公方考績北上
至南安得報

十一月抵家逾三月單車就道

二十年辛丑公至廣西復奉

勅督造黃冊

勅廣西布政司左叅議吳鵬近該戶科都給事中
郭整等奏稱國賦重事係於黃冊往年民間攢
造多被里書人等變亂戶籍埋沒軍匠飛灑稅
糧詭寄田地漏報人丁脫免差徭那移里甲以

致版圖日消人民日困兼以紙張粉飾差錯稽遲為弊多端茲當十年大造之期乞要定委官員督同各州縣官躬嚴稽察參互磨算專一管理攢造黃冊不許別項差占等因今特命爾委官嚴督所屬用心查算刻期編造務將各項弊端盡行裁革俾圖籍有據賦冊均平以稱朕均國足民之意造完之日繳勅奏聞如或因循怠忽憑信奸宄變亂舊規致起弊端聽南京管黃冊官指名參奏重治不饒爾其慎之慎之故勅嘉靖二十年九月十八日

蒼梧有書院故韓襄毅公雍開府舊址也廢為傳舍有妖據之為崇止者輒斃公欲憇之從者以告固請止公叱而入命從者趣就寢不吹角不擊刀斗懸燈獨宿於妖室有頃從者驚呼起則髮皆相繫公厲聲問故髮即解中宵見白衣者坐於梁足下垂地張目視公公佯寢遽曰大人也滅跡入豈後後不復為害

九月二十日子紳生

王氏出

二十一年壬寅公分守左江諸郡

左江乃蒼梧中商旅通路夾岸皆獠獠出沒邀劫官民痛之聞公至皆歛手云吳爺分守我等不可攪擾至是二年之間不復為梗

二十二年癸卯夏四月陞雲南督學副使

皇帝勅諭雲南按察司副使吳鵬

朕惟自古帝王治天下者率以興學育材為首務而學校之興廢人材之盛衰治道之隆替繫焉此蓋已然之明驗也今特命爾往雲南巡視提督各府州縣儒學爾其欽哉夫總理一方之學政是即一方之表率也然率人以正必先正

已爾其務端軌範嚴條約公勸懲俾為師為範
子者一崇正學迪正道革浮靡之習振篤實之
風庶幾儲養有素而待用不乏斯足以稱簡任
朕之意如或因循歲月績效弗彰將爾責焉爾
其勗共所有合行事宜申明條示於後其慎行
之毋忽故諭

嘉靖二十二年四月二十四日

按令甲凡憲臣奏使授勅事竣晉繳獨督惠
倘兵屯鹽使者許藏於家此特典也近來亦有
繳例太保公歷貴州廣東雲南督學經十年餘
三勅其在貞葺一堂顏曰三勅箚筒錦袂日暉
龍蟠護以朱函置諸上棟兢兢寶秘儼若威顏
視今之晉繳騰黃者榮寵亦甚矣願我子孫世
世守之永戴君恩川光斯譜

長孫惟貞謹識

督學滇南贈言

歲癸卯夏默泉吳公權滇南按察司副使奉

勅督理學政寅齋葉公輩謂茲行當有贈言以屬

不肖其能以不文辭為之言曰在昔學術素明
習尚趨正人才成於陶鑄士類奮於後先濟濟
蜚英元凱之倫也有過必知顏子之仁也侃侃
庶政冉季之治也鷹揚鶩騰伊望之事也是以
治隆俗美教洽化行人文貴於天下偉哉邈乎
不可及已自是以還經生學子放失理要崇尚
枝葉恠譎蠱動巧智橫生或飾真以仇偽或挾
奇以干榮或詭道以要上或鬻技以自矜嚶嚶
曉曉浮佻之風盈天下不特滇南一方為然也
亟而反之宗盟吾道者實職有競焉公之往也
能不厭誕抑譁而鎮之以默乎孔子曰默而識
之他日繫易亦曰默而成之不言而信聖門自
顏曾而下穎悟莫如子貢至勵羣弟子乃謂賜
之辨賢於丘也而猶欲無言以警之者何哉矧
子貢學已深造而禮樂德政之論天階日月之
喻率多善言德行非夫今時之習浮佻而師嚶
曉而循循善誘終日言而不離夫子又終非默
者獨於此乎規之蓋憂其辨愈肆或流而失之

誕是故警之以無言者欲其歛華就實而長善以救其失師之不容以或已也厥後得聞性道與顏曾同科則默之功也以是知夫子之善教賜亦可謂善學矣今公以默自況是化育之本倡導之機已得手孔門教人之心即固不必滇南人士之習浮僥而師曉嚶也縱有之公奚病諸然則公又奚取於泉焉夫泉徧與諸生而無爲也似德埤下据拘必循其理似義洗光乎不涸盡似道赴千仞之谷不懼似勇主量必平似法盈不求概似正綽約微達似察以出以入就鮮潔似善化此固效用於動自有莫之禁焉者迺若涵於太始出於山下渾淪淵泉其體未嘗不靜而默也公推尚絅之心以積於人之所不見由不言而信之誠以究於不顯篤恭之妙觀瀾逢源真得夫靜深有本而思默以底於及泉也已由是而出焉弘濟博用之謂德立不易方之謂義泛應各當之謂道強立不反之謂勇約成人小子於章程而無所回互之謂法齊高貴

猗寒於藝極而不可屈撓之謂正祛濁黜垢刷奸纖悉洞達瑕疵莫逃之謂察賢智者有所俯而就不可肖者有所企而及領惡全好易過至中成將醜浮能曉嚶之趨以還貞固淳龐之舊且得其事如伊望其治如冉季其仁如顏子其倫如元凱者濟濟洋洋羣飲各足不至厘夫子警賜之憂而使滇南文物滂焉與中土同流夫是之謂善化而默泉公在昔濬源洙泗校文齊魯及門入穀率係清流憲學嶺南而江漢秋陽多士至於今思公之澤不衰夫山東有功利誇詐之風而廣南成浮靡富侈之俗積習不同號稱難化公行沛然莫能禦之有明徵矣則於滇南乎何有僉以予言爲不鄙遂僭爲之敘

陳洙敘

行李江頭拂曉晴當筵且復聽新聲象巖龍洞暮烟紫赤水丹涯霜葉清此去北風吹錦纜春來東閣領弓旌炎方朔土惟王使獨有交游不盡情

歷洲長弭楫底事五湖遊偶落處舟夢寧忘壯
 士愛鴈空懷北極烟瘴入遐陬十載耽茶癖
 狂笑濁流
 村靜烟樓後江搖日落時未逢袁紹酒深感杜
 陵詩解直道如周相清詞逼義熙使君來出牧
 千里更如期解

姚芷

我行二千里相送飛鴻翼不辭天風寒况憚瘴
 雲黑豺狼苦縱橫掃除恨不極念此五情熱揮
 戈期殄克盤餐荷見邀對使輟朝食欲往聆訓
 辭嗣服以為則三老貪利涉鼓棹未能即寧知
 良會難千金博一刻勞君遺我詩情誼感周悉
 易簡願各珍險夷端可測

馮徽

五月八賚

勅入安南諭大都統莫福海秋八月還廣西

勅諭曰朕惟帝王天下為家欲使萬物各得其

職貢近年朝貢不至推厥所自寔惟爾祖登庸

之罪已命官往勘征討爾祖延能悔罪改過恭

上降表備陳私相授受之非願獻人民土地聽

朝廷處分該尚書毛伯温等奏報兵部集議題

請謂爾祖登庸畏威投降輸情待罪朕仰體

帝好生之德俯順下民欲逸之情一切赦之革

去國號王封授以都統使之職賜從二品衙門

銀印俾奉正朔朝貢許其子孫承襲世守其地

實為爾類永利也茲該鎮巡等官奏稱爾祖登

庸病故爾係嫡孫且爾能備陳爾祖納款之誠

備述爾祖屬續之言亦可謂善承祖志者矣特

命襲爾祖都統使之職仍降勅諭爾其益竭忠

誠恪修職貢撫理夷眾安靜地方以稱朝廷懷

柔之意用副爾祖恭順之誠永為多福願不美

數一應事宜悉要遵照原降爾祖勅諭內事理而行欽哉

先是福海與前都統陳有巽朝命大司馬毛公伯溫勘理福海悔過乞自新 廷議寬之以公

往諭公至安南福海依山為營旌旗繁戟森湧直左意規使者舉止公抱勅揚言曰我

大明天子有命爾屬國敢不拜受皆伏地呼萬歲既而諭福海以大義福海感謝歸欵彌篤

二十三年甲辰春三月公如雲南

長子繼成室娶翰林諭德屠公應垓女

夏五月長子繼補郡諸生

二十四年乙巳公在雲南試諸生

滇南壽言

默泉先生昔督學於吾廣廣之士師事之不啻

如其父兄已而擢廣西參議時論譁然稱謚居無何陟為憲副督學於滇南滇南故遠壤民俗多自殖而惰於行學士質美意高則務辨博賤忠質修詞飾貌或盪於聖人之道先生雅敦尚行檢黜浮崇實為之風範而示軌焉乃預以禁於其未發時以因其可磨使相觀於善馴之而學不陵節士皆鏘鏘濟濟服其父師之訓而迺其知能之良又使修其六藝志其六行謹其六德斷斷然以聖賢為必可師故登降揖遜合於禮應對頰仰合於樂步履周旋合於規矩庠序翕然改行易觀不佞他日其弟子師事先生亦不啻如吾廣君子是以知其能得士也是歲夏仲教授周奕訓導劉元勳熊宗周率諸生來造予言曰奕等受恩於吾默泉夫子庸詎知所為報德惟是月二十有二日為吾夫子懸弧之晨願得公一言為壽予曰來諸生試言所以壽而師者則咸載拜稽首曰奕等蓋聞至人神遊八極道合三無故能煉氣修真長生卻老吸沆瀣

之精服偃佺之食挾洪厓之術引錢鏗之年抱
一出青牛之闕朝天載尚方之履逍遙徜徉與
世無極請以是祝夫子也予曰來諸生聖人之
門無譚仙釋者曰然則請易之矣蓋聞汾陽福
肇於興唐綠野居成於平蔡姚相位隆於八柱
桓傳望重於五更香山九老功在斯常洛社耆
英名垂竹帛夫道德功業並隆者人也令名壽
考兼得者天也請以是祝夫子也予曰壽然而
非其至者也君子積善而慶來基德而福返故
曰儒有忠信以為介胄道德以為干櫓戴仁而
行袍義而處是故易和而難狎也易懼而不可
劫也交親而不比言辯而不亂盪盪乎其易才
可失也礪乎其廉而不歲也溫乎其仁厚之光
也超乎其有以殊於世也用能履百順幡幡為
國之黃耇且吾聞之君子於人擇而後樹不樹
而後擇諸生非先生所樹之桃李乎自今有賢
才者出就列則可以尊王庇民經國則可以祈
天永命是謂得其休息而食其實焉壽其任

茲予壽其在茲乎於是諸生曰諾敬聞命矣予
乃命之歌思齊之五章咸磬首載拜颺言曰奕
等不敏曷敢不敬共夙夜以承夫子無斁之訓
乃更命之歌南山有臺俾適默泉先生之館稱
觴焉

嶺南岑萬贈

參知閩藩序

默泉先生吾浙聞人也謬予不佞重有交承之
誼茲復辱在寮案玆德問政弘益良多蓋先生
奉

書提文印垂三載於滇矣倏被

簡命晉參知政事於閩藩維時滇人士咸旁皇胥
視謂若奪之依歸兩庠師暨弟子尤切戀焉儼
然相率造於庭丐予言贈予方倥忽簿領舊植
荒落其何以文先生之行哉辭且再請益敦乃
進而諗之曰先生之教云何而若德之深也其
師曰吾儕釋逢掖踐俎豆呻吟估畢惴惴焉日
惟升斗是謀微先生其孰優而容之矜而體之

振掖焉使信其氣綱維焉俾業其官夫教然後
知困先生寔有大造於我也曷忘諸其弟子曰
吾儕眼遐裔局諛聞闕觀戶庭謗謗焉日惟曰
耳之驚微先生其孰行以率之文以範之決迷
途而道之康莊起醉夢而弄之大寤夫學然後
知不足先生寔有大造於我也曷忘諸曰是謂
善言先生矣然而莫探厥蘊也是知其為教矣
莫知其不教者為深也先生起嘉禾儒族勿挺
奇質夙蕙令譽恢博統貫其學靡所弗窺為文
非事奇僻必要諸理致弱冠登進士高第輒發
然夙自樹立其筮仕水曹也優游風雅時日為
遜甫之儔其更武部也經濟甲兵人期以韓范
之烈用是聲稱日起一推督學貴陽貴陽之士
聞風為之委心再推督學東廣東廣之士觀德
為之不變迺若師弟子衣被云者其諸嘗試之
緒餘耳惡以盡先生之蘊哉知軒朗振邁之度
純和清約之修又有非聲音笑貌可為者乎雖
然先生自此升矣政猷托天下風範在廟堂蓋

有可望而不可即者蓋圖以報諸夫亦瞻忽若
趨如聆警歎敬恭辭則不異提撕居焉為良士
出焉為名流務深道德之造靡貽在簡之思庶
無負於先生矣夫徒以不腆之言豈足贖行李
哉

臨海蔡雲程敘

秋九月十三日長孫惟貞生長子繼出

二十五年丙午春公陞福建右叅政督理糧儲

敕福建布政司右叅政吳鵬福建所屬倉糧比先
因無專官管理徵歛不時奸弊滋積以致各倉
空虛衛所官軍往往告乏今特命爾不妨司事
兼管所屬各府州縣一應糧儲務在及時徵收
督令依期完納其各年未完糧米逐一查方拖
欠之嚴限追併包攬侵欺者追問明白照律
例施行出納之際一應通同侵盜容隱冒支之
身證害民等項奸弊俱聽爾設法禁革敢有違

犯者干碍軍職及文職五品以上官其實參奏其餘就便拿問懲治爾左須持廉秉公正已率下俾宿弊頓清糧儲克羨軍不告乏民不告勞斯副委任母或因循苟且自貽咎責欽哉故勅嘉靖二十五年六月二十五日

秋八月公便道抵家十一月之任

二十六年丁未公討平洞賊陳日輝等

佛耳覆巽小珠大环及鄉雲嶺白葉坂諸地屬龍溪安溪等縣宿莽叢棘山徑深窈賊阻險峭聚劫害民居大中丞朱公統檄公討之公提兵深入擒渠魁陳日輝相機勦換遠近安堵因復徧涉其地圖山谷形勢上方畧六事俱見施行

次九月陞江西按察使

是年因兵事未竣留帶閩中

江右總憲敘

聖

天子覃化萬民明刑弼教動緣民情則天象也

而猶曰今往何監非德於民之中乎內而司寇

簡男大僚以明重也外而憲伊特重其選必歷

試中外積有成績者迺得與焉勞而尚賢也矧

茲以在在憲維艱余迺屬於吾閩參知吳

公式稽其勞昏可按而覆也王言曰都往敬忌

其茲則有大僚之望也公昔筮仕工曹歷刑陟

兵正本澄源弗撓以私人稱其毅校文東魯崇

惟黜浮名賢入彀士無留良人稱其明少參廣

督滇南以道稽文作士孚先人稱其化正賦地

煩釐弊剔蠹以懋茲參藩人稱其惠公典是

憲也不既有餘地乎且閩粵固豫章接壤也

川同氣民俗同風造父不以易御而改執后羿

不以易射而改絃君子處必有道者德威惟畏

德明惟明不玩其法則下作乎不舛其情則下作惡大江以南民財罷也曰猛虎可留而苛政不可逃也從古已然於今或不免焉往飭百寮而令鎮集之清以其不欲辨以其不阿寧以其不矯淳以其不泥風之行而亦可以復君子之教矣矧公剛柔成德以文學而飭吏治者也不趙文子不勝衣之恭而操尤不可奪有公孫僑不可遺之愛而民尤不可欺廸稽庶績彰厥有德受王嘉師監茲祥刑邦其永乎于沐公雅愛僉屬用卿何足以終私哉鄉諸君子沐公雅愛僉屬用卿曰何以申贈用卿非敢為佞也救芾其棠勿剪勿拜吾聞之情也不食德而遺功夙夜匪懈以事一人默泉公之義也不弛勞而底豫克諸君子之情達於人克默泉公之義達於天矣余奚贅焉

龔川卿敘

君子之德何其多而難全也洪範列所以又人者沉潛高明之不可兼則克之以剛柔必有管

於剛柔之克而後沉潛高明者得歸於平康其始蓋亦偏矣后夔典胄子之教悉數其目有直實剛簡之繁而直寬者懼其溫栗之不足剛簡者憂其傲虐之為害彼昔學於上而且有承之庸之之望其所以教猶當誘其未備而防其不及如此然猶謂治教之法待之詳而設之豫云爾臯陶矢謨言人之德其多至於有九當虞之盛宣明其三嚴敬其六者皆可以為國之用爵莫尊於諸侯事莫重於大夫其諸侯大夫而熙浚明亮采之載者亦言其人其德止於三六而已德之難全厥已久矣以予觀於吳默泉先生之德何其全也方乎其外未嘗止而不行也介乎其中未嘗劇而難邇也動乎其不可禦而若有約而得之者而動出於有怕矣燕乎其無所之詳不可以遽列其於臯陶所聚蓋不具者鮮矣道德之一莫盛於有虞之世克全於德者禹益臯陶之外其為諸侯大夫者已相為多寡其

不能至人三六而僅有其一二者宜多奮於治世之庸如是亦烏得謂之一彼皆昭乎其宣明肅乎其祇敬有者無所棄於無而無者不以思乎有多者不敢病乎少而少者無所愧於多雖有三六之未倘與夫一二之僅有而卒謂之居事於時然則所謂九者何嘗不全而又烏有不一者哉有虞之君子所以為威臯陶所以得示其德而日之執其目而知之靜言而士色者不得厠於其間今之君子則異於是其以傲無而無者以嫉有多者以之為人而少者以為人愧偏黨反乎臯極惡戮汨其彝性志不通乎天下而俗不同於斯世其患非一日之積也無者既已嫉矣少者既已愧矣非無有者之能致無多者之能容少者又何必望焉今之君子有而且多者既莫如先生且將有大位於朝也必有所治也必有所教也以平康者治以中和者教忘所有以矜無而無者將日進於有舍所多以從少而少者將日進於多然後其進而勉者受之

可得而知施之可得而事也融釋偏黨泯絕惡教常倫以還大中而君子之德不為徒全矣非先生其孰為之吾竊為先生望之矣郡博士紀君其賢能知先生之德者欲有以贈先生而願中為之序

晉江遵巖王慎中敘

憲使之設始諸周之陳時臬事漢之直指觀風唐之巡省察訪逮我 國朝稽古立制內臺置都御史外臺置按察使中外並峙皆以振揚綱紀為任非降實宿望無足寄者於是吾閩藩大參默泉吳公而有江西憲使之擢夫江西為東南藩屏襟帶淮海甲吳楚荆蜀之雄然百察森布衆務紛紜獄訟叢萃視他省猶加蓰倍故朝廷以是而寄於公者殆淵衷之所深注歟公弘毅而溫文高明而粹雅淵然曠然若以天下為度余令嘉興時邁自釋褐遂以公輔望之及登進士歷主諸曹參贊紆張聲動京國值聖天子右道崇文命乘山東文衡復督貴州東廣

雲南諸省學校公登庸雋良鎔鑄多士彬彬楨國者咸其簡拔造就之力則夫奉國之公經世之學其足徵矣其於議西廣參閩藩也彌諸岳政綜理錢穀上承德化宣布惠澤殆懷德惟寧者耳則夫康濟之才涵育之仁又足徵矣是故學以明道才以飭政則足以弘邦家之治公以制事仁以宅心則足以遂民物之生移而蒞憲特運之而已余知夫公沿俗以施宜因時而制化明禮樂酌賞罰章淑慝煦覆育咸協乎經權胥準其範軌如是綱挈紀張度貞察肅不動聲色若喬嶽具瞻置斯民於皇極收雍熙之治功憲司重寄公誠無負矣雖然學通於今古才周於國家固公賦受之良而心存天下澤及萬物尤公素定之志彼豐功偉政豈獨施於江之西哉他時茂陟台衡經邦論道迺其道德所發越政事所會通耳故曰蘊之為天德發之為王道措諸天下謂之事業公實允蹈矣維時藩臬諸名公謂余知公之稔者欲以言贈遂不揣而敬

書之

半洲張經敘

二十七年戊申春三月公至江西

是年春公之江右迢構李因歸展墓檢篋中藏書有蠹魚文深入楮幾寸似古篆識者辨之曰此興元輔鼎字也刻石於家
蒞任甫下車故事江西藩臬讌集皆樂藉供具公以樂藉非良民奈何溷上官且誨淫非體因與同官約曰即非公讌而相徵飲會其以月俸無復以樂戶於是汚風遂革

二十八年巳酉公在江西

公掌憲歲餘肅紀綱祛宿弊平刑獄按胡彥薦章云吳鵬端慤以立巳而積之也溫嚴毅以臨民而行之也恕百姓蒙廉靜之澤遠近自有口碑庶僚仰貞肅之風上下舉皆心印

重器公
輔宏材

春二月陞江西右布政使

右方伯敘

初默泉吳公長我憲臺也正已率物振哀飭蠱
 憲厥典常臺中之評斷斷如也治旬而政觀已
 萬法禁陳詔言展采錯事有嚴有翼胥史阜
 與慎簡有徒罔不惟人亦罔不共命列栢外內
 井如也秩如也踰月而百度舉已乃求情麗法
 師聽並觀訟者盈庭各殫迺詞情偽微暖舉無
 遺照術楊錙之具示法耳矣無冤民無佚罰
 三月而政成頌聲大作於是以其暇日集僚吏
 選可勝燕私飲酒投壺嘯歌譁若第昆比遷秩
 而為右使也去有遺思焉然亦幸其不我遐遺
 而猶借寇於茲土也或謂乎陳子曰吳公之政
 若是其惠乎曰嚴然嚴而不殘矣蓋其馭下也
 嚴亦振激紀綱而已矣未嘗過如東濕也然則

其治獄也若是其嚴乎曰寬然寬而不弛矣蓋
 其議獄也寬亦不為苛請它比而已矣未嘗惠
 好長惡也是故官師仰其靜治氓庶戴其公平
 吾儕諸人亦莫不儀厥典刑安其煦沫今雖獲
 奉周旋於茲土也若遠去我而羽儀於天朝
 也同臺諸大夫聞陳子之言咸相謂曰子之言
 不寧克頌公之美已迺吾儕私衷亦與有述焉
 曷持以贈公因以請於峇帥諸公命史書諸冊
 公以去歲戊申冬十月受
 命遷右布政使贈言則在己酉十二月蓋已踰
 年若無幾何而爰立之
 璽書殆將下矣
 王泉陳鳳敘

秋八月公提調鄉試

公在科場兼陪周易房考之缺公
 治毛詩迺所選治易士尤負民譽

二十九年庚戌春正月轉江西左布政使

公為左方伯時江西撫州等府忽益錢穀數萬計各郡申理之事迷本始監司莫能究詰公思之曰是必出猾胥耳窮其狀迺南昌孫明李暉等猾徒總造冊籍受賄潛竄焉遂寘之法民皆

之感
威
子

六月江西布政使司派糧節略錄成

羅念菴書諱洪先
往奉書之次日即聞內召之命為天下賀為故土不能不懷戀戀也因選良行敬裁尺牘以上抵南浦則前旌載途數日矣豈任悵望伏讀新刻派糧節略顛末詳明增損畫一彼姦既莫遁其情而又不盡置之法不惟利口無所售縱有深衷亦且感愧而歛嘿矣破積弊於數年之後布惠於數十郡邑之中而不煩一辭坐收成效此豈瑣瑣目前可以希覲者哉即今多事之秋正藉籌畫以足國計此只須願指可了而飽

日措社稷於泰山之安四方觀聽未嘗一動聲色孰能為之先者其江西區區尸祝之誠宜不足為門下重也不肖庸病日久羸廢益甚仰辱知愛無以為報惟求內不愧心外不愧鄉人庶幾可畢此生然斯言固難踐也奈何臨楮惶悚是後通候踈絕迺病廢之常惟不訝幸甚幸甚

閏六月

閏六月陞都察院右副都御史奉

勅巡撫江西等處地方

皇帝勅諭巡撫江西都察院右副都御史吳鵬江西一省地方廣闊伏盜藏奸民繁訟擾巡撫之官責任匪輕今特命爾前去彼處巡撫嚴督所屬操練兵快修理城池撫安軍民祛除姦惡凡事干軍馬錢糧等項有應與巡按御史計議者亦須公同議處停當而行各該府州縣務要時

常往來巡歷但有盜賊竊發即便督同三司掌
印守巡兵備守備等官措置兵糧設法撲滅毋
令滋蔓司衛府州縣官員有公廉勤幹修舉政
務者量加旌獎貪酷不才虐害軍民者爾即拿
問黜罰應奏請者指實參奏其事有便於地方
軍民物內該載不盡者悉聽爾從宜處置具奏
定奪爾為憲臣受茲委任尤宜殫心竭力正已
率人如有處置乖方責有所歸爾其欽承之故

諭

嘉靖二十九年閏六月二十一日

吉安有夜行見殺者厥明家人往歸其骨四顧
原野無人蹤而樵者負柯至輒訟之監司監司
令郡司理鞠三日即論歿蓋以售捷云公為方
伯同心疑之曰樵者殺人非報仇則利其財耳
何以卒無事實至是為中丞得殺人者於是雪
冤民効司理公撫江西最得遠近士民心嘗積
穀課最以備荒嚴飭保甲以弭變其餘稽覈黃
冊清理屯田均派賦役會計錢糧通融鹽法節

省驛遞平允獄訟不厭煩瑣事事合宜至時處
宗室及選婚諸事尤為得體

都憲序

龍集庚戌春三月浙西默翁以吾省右轄拜左
轄之檄若無何巡撫大中丞東沙張公有南部
之擢復遷公代之命下之日江右士民罔不

鼓舞相慶以為得久沾公化而永福星之戴也
予素辱公知愛敢罄一言以為公賀賀非私也
為吾道賀也為江右之民賀也為

聖朝得人賀也夫以巡撫之設即古之使相節度
宣撫之任自漢唐迄今其來遠矣總握憲度綱
紀百司持正論於朝廷植風聲於天下其所

以翼於君正於人尤可知也况我江藩彭蠡之
漚記之禹貢匡廬之勝詠之前賢生齒之夥人
物之盛財賦之繁寔東南一大都會斯地斯秩

嘗慎所授今

聖天子不次而委於公者豈偶然哉蓋以公抱天
人之學經濟之才冰蘖之操優於負荷簡在

帝心久矣公之所以自負而自信者益豈敢輕哉
道不於此大行吾不信也攷公往轍少忝於廣
大叅於閩掌憲於吾臬輒有偉稱被惠者不可
為數茲位愈崇任愈重生乎忠君愛民之志可
以展竭無遺文章煥而將略閑安往而不宜哉
吾知出入將相懋樹勲業屹天下之峻望者於
是乎兆矣詩曰文武吉甫萬邦為憲書曰道洽
政治澤被生民敢以是為公期而亦以是為公
頌漸予無似匏繫一隅慕公而不得見蓋亦有
幸先儒所謂終身迷惑一言了悟何時促膝盡
此平生駐節芝潯端有望焉
高皇六世孫淮藩月函道人書於洞天清隱

保釐賀言

世之稱撫臺者率以保釐歸之蓋取諸卑命云
江右視東郊異矣然彰善瘴惡慎固封守治政
治以澤生民休前政則未始有遠邇古今也保
也者統而愛護之也釐也者析而裁成之也譬
諸理家然尊高年慈孤弱嘉善而容眾至於樵

叟爨婦咸俾得所以均食貨以糾爭訟以禦寇
攘以對於上下神祇品式詳明脉絡貫徹而無
有廢墜不舉之處故愛而護之以盡仁裁而成
之以比義其諸聖學發育峻極之方乎正學日
湮各以其質所近才所便自為陶鑄慈惠可以
煦眾或失則玩嚴厲可以集事或失則殘詳慎
可以防姦或失則滯通敏可以應變或失則忽
古之訓曰修其教不易其俗齊其政不易其宜
弗修弗齊與易俗易宜皆足以圯教而妨政其
惟大公順應以儒術宰吏治乎默泉吳公學博
而志卓翛然超萬象而游於物之初頰首婚宦
馳驅仕轍從人情物態中鍛鍊天機故不動聲
色政集而譽孚兩振教鐸誘舉業而合諸德業
炳然嶺嶠滇池之間執我臬事奠麗陳肆從鞭
撻桔槔中以敦倫理正名義為準薦歷岳牧洗
剔姦痼批卻窳尊肯祭誅然就緒吏人不敢怨
有我公不將久陟之風天假德星纘東沙司馬
以保釐吾邦也邦之庶寮庶士庶民其津津後

下流矣故釐於賦役則吏無乾沒民無讐歛而
 眾保于財矣釐於刑獄則弱無冤抑強無縱吐
 而眾保於壽矣釐於兵戎則伍無影占籍無冗
 食而眾保於力矣釐於舉錯則直無遺旌枉無
 漏黜而眾保於位矣釐於聽納則愛無私譽憎
 無妄毀而眾保于善矣茲惟祝哉三司之長鮑
 君象賢鄭君世威文君相偕其僚某君某某君
 某某君某某君某某君來山中以徵賀言益也詩
 其奚以賀賀以爵位乎則詔德詔能業命之矣
 賀以勛績乎則立政立事業乎之矣其將賀斯
 道之平治而為之兆乎師保萬民民懷其德周
 公之綏定也寬而有制從容以和君陳之孝恭
 也克勤小物正色率下畢公之弼亮也公其攸
 攸懋終之而已能保小民考可以保王躬君民
 一也能釐庶績者可以釐天下天人一也南山
 崇扈所以祝君子也曰光邦家茂德音而萬壽
 無疆曰受天祐憲百辟而萬福來來三代上下
 相與之隆若家眾之拜賜于長其真誠則恒

安成鄒守益叙

三十年辛亥公在江西

時部議欲裁江西兵食以克邊餉公議得據江
 西布政司呈抄奉本院案驗准戶部咨前事備
 行本司依奉查得江西省所屬府一十有三州
 一縣七十有三共編有機兵三萬一千三百四
 十九名每名每年除器械銀二錢外該工食銀
 五兩四錢共該銀一十六萬九千二百八十四
 兩六錢遵照明文徵銀一半解部實該銀八萬
 四千六百四十二兩三錢但本省雖介在南服

如南昌饒州南康九江臨江等府屬俱邊江湖
 不減直隸如南安贛州二府為江湖樞鍵嶺嶠
 咽喉設立軍門不為無自其餘廣信撫州袁州
 建昌吉安瑞州等府或拒闕屏越或鄰江引淮
 俱係要害之地以上府屬若必欲折半徵銀誠
 恐兵不足用而地方先事預防之計或踈一也
 計其工食每名原額七兩二錢先年因百姓艱
 難出辦不前已經內減一兩八錢止存銀五兩
 四錢不及他省饒裕二也况本省工地瘠薄民
 多趁食四方土著者少若五兩四錢之內再減
 其半不足以供其俯仰之需將棄而之他三也
 再照各府屬機兵多是催募之人下班之時無
 農可歸自然渙散儻地方倉卒有變呼召實難
 四也相應酌處量行扣減工倉每名扣銀八錢
 共該銀二萬五千七十九兩二錢解部庶邊餉
 少資而地方有賴等因案照先准戶部咨該河
 南等道掌道事山東道監察御史黃如桂等題
 稱各處民壯弓兵之役量行扣解該本部覆議

得民壯弓兵及快手三役內民壯快手適年俱
 久在衙門聽用勾攝公事甚至雇倩游食之人
 頂替實為冗役合行各處巡撫審酌事宜如北
 直隸陝西山西雲南貴州兩廣係近京近邊地
 方南直隸邊江邊海有巡船處所俱照舊應役
 外其餘如南直隸江浙以及山東湖廣河南等
 處止量留一半守城巡捕其一半俱放之歸農
 免其著役准將本役原編銀兩轉解太倉備用
 其弓兵除無衛所地方照舊外其有衛所之處
 係緊要地方者許令巡撫撥委軍衛官軍代為
 把守將弓兵一體徵銀解用各巡撫務要將原
 行額編各役名數及應折徵銀兩數目造冊先
 行送部備照查考等因俱題奉

欽依倘咨前來准此照得江西一省額有南昌袁
 州贛州三衛吉安等一十一所比因軍伍銷縮
 各無足數除運糧屯田守城差操之外所餘無
 幾又皆貧弱不甚堪用之人計本省巡檢司一
 千一十四處均徭審編弓兵共三千二百八十

七名每名工食銀三兩六錢共一萬一千八百三十三兩二錢其有巡司去處皆緊要關津與軍衛衙門寓隔不相聯屬今欲驅衛所貧弱不堪用之人而充弓兵之役軍當民差既不樂從亦無固志設有緩急何所倚賴民壯快手原無縮僉通係機兵承克就經案行布政司通行議處去後今據前因為照徃役者古今之通義同心而共濟者臣子之至情今戎務方殷財賦告竭忠於謀國者不得已為此一時權宜之計凡為臣子孰不思效其尺寸以克國用也哉然根本枝葉之間並有所當慮者本部議題內稱行令各處巡撫審酌事宜如邊江邊海有巡船處所俱照舊應役其大意識在於是用將以通變盡利使枝葉之繁且茂不為根本之累也今查得南昌饒州南康九江臨江等府憑瞰江湖南安贛州二府隣接閩粵盜賊淵藪出沒無常袁瑞撫吉安建昌廣信等府較之南昌等府稍若不同然深山大箐盜賊叢聚防守亦不可懈

今若減一半徵銀放之歸農不惟地方兵足用又恐所減之人別無生理去而為盜適貽他日根本之憂委應酌量審處但本省機兵原編工食每名止於五兩四錢今量扣銀一兩計三萬一千三百四十九兩弓兵工食每名止於三兩六錢今量扣銀五錢共計一千六百四十三兩五錢徵解濟邊庶幾根本枝葉之間培養安固地方不至缺兵軍士不必改撥邊餉亦或有萬分之助矣為此除一面行令布政司通行所屬照數扣追前銀解司至日另解外今將查過所屬府州縣并各巡檢司原額機兵弓兵名數并審處酌量扣追銀數備造文冊一本除咨戶部查考外理合題

青

知為此具本專差承差涂輅齋捧謹題請

三月訛言四起居民逃竄公廉其人磔都市民廼

定

野聞紀事

三十年辛亥春三月民訛言逸時默泉吳翁巡撫江西有無稽子拾贖報譎於衆口昨歲蓮子入窠亦歲赤子懸梨非女蒙辱百僚束手向有餘日蓄牧貨帑盡驅而北

上怒下廷臣詰邊吏故對曰中國長技日設險曰陣法曰火文往昔王師巡邊虜輒款塞今皆詞焉故敢匪茹整居三關遵薊其江南亡命吐而誘之乎盍密師屠其九族吾聞大軍旦夕至矣於是村氓河內煽惑相與飲泣捐親戚毀廬舍烹雞豚揭囊索舍耒耜遠竄巖崿闖入城市鼠駭狼奔日絡繹道路有司不能禁止敬子謂之嘆曰甚哉斯民之愚也造言者奸人之雄乎其乘機以逃適負歟倡亂以掠財貨歟惑衆以列罪歟盍聞之郡臺焉公檄諭廉得其人按部言遠近郡縣稍安集糧餉之民室家相

君子曰勝廣之寇起於揭竿定國安民止亂非天下之仁明勇莫能與於此詩云民之訛言寧莫之懲又曰豈第君子民之父母非至德其孰能之故紀野聞以述事

熊杰紀

夏六月陞工部右侍郎秋九月涖任

少司空序

自昔嘉靖改元五星聚榮室之次而大司空之祥屢屢徵應矣或曰廟祥也或曰文明合於工官聚德之象也二者皆有明驗如執左券故今司空卿座率皆大賢碩儒萃於一堂邦上賴之天人之應豈其微哉今年夏少司空缺人僉議咸謂城隍不驚四民奠居皆掌邦土之所有事也非重厚大臣佐理之不可迺推我默泉吳公以聞

上雅知公名然之於是擢公以為少司空由聚德之言觀之天道良不誣也公性度宏達器宇光明敏決而周詳直毅而平恕昂頰紳縮動中機

宜無乎不可者可謂厚德者矣又崇古邃學時
稱博雅督學三省作人之功居多自擢江西憲
長者刑劓竄寬滯燥雪未幾擢為方伯裁制有
則宿弊頓清於是又擢中丞撫安益至酌定均
輸修格釐然畫一江西之人至今利賴之昨有
詭言四起一切鎮之以靜不動聲色而搖惑者
自定非所謂經濟有本功德並隆者耶今司空
有約菴歐公劍菴梁公雅德重望天下推服公
彼膺是任應茲營室聚德有徵信乎天道不可
誣也然是道也於易有之易之萃所以言聚也
其象象曰君子以舍戎器戒不虞是以人道贊
天道也是故主萃於上以戒不虞者九五以之
九五萃有位而曰元永貞悔亡言聚德也引萃
於下以戒不虞者六二以之六二引吉而曰孚
乃利用禴言聚此德以孚於上也乃今北虜猖
獗內治益嚴左右六卿慎選在列又屢勸天語
戒飭有加非所謂萃有位者乎我公功德並隆
彰聞於上茲掌邦十入請

帝猷與公歐公梁公同德寅寅亮百工載績非所謂
引萃有孚者乎詩曰百辟卿士媚于天子不
於位民之攸暨聚德之道莫有大於此矣矧公
鑒識精確調劑有宜充斯德也秉衡和鈞以上
佐天子于羽格頌文德弭亂則文明之治與天協應
又何戒不虞之有邱報既至公時撫行安成即
旋會省將行例有公宴藩臬三司各稱觴以為
公壽酒行樂作樂工乃歌敬天之章曰昊天曰
明及爾出王旻天曰旦及爾游衍頌公巡行有
度日鑒在茲可以贊天道矣行侑又歌江漢之
次章曰四方既平王國庶定時靡有爭王心載
寧頌公撫安江右之功也陽施陰翕而十三郡
之民賴公底定可謂能盡人道矣酒酣樂甚公
如卜戒行執事者請書于策鵠當在列於是
書之

鄭廷鵠序

三十一一年壬子春二月奉

旨遣祭天壽山者三

公以直忤逆鸞適邊警鸞欲陷公八月鸞誅盡
肅皇帝英明善類獲全矣

秋八月公奉 旨督理軍器

山西宣府薊遼羽檄旁午廷議詰戎
上特命公督理公閱盔甲腰刀弓箭弦條檄袋神
火器械給自內庫廠局鍋鋸召商買給禮金尾房
龜火藥鉛彈等料仍行經由郡縣處辦有差

九月轉刑部左侍郎

吳太宰年譜卷之一終

吳太宰年譜卷之一終

書

終